

Cantiques dé Noué en Jèrriais

Jèrriais Christmas Carols



© L'Office du Jèrriais

Eune collection d'cantiques dé Noué et chansons d'Noué en Jèrriais

(édition Dézembre 2024)

Cont'nu

À haut à marchi	124
À la Sainte Lucie	132
À travèrs les montangnes	40
Anges des régions dé la glouaithe	21
O Arbre dé Noué	17
Atout jouaie dans l'temps jadis	28
Au bèr du saint êfant	122
Aussi bein qu'les Trais Rouais	92
Ayiz eune jouaiyeuse et bouonne Fête dé Noué	123
Les bein bouonnes bêtes	85
Des bèrgers gardaient lus troupieaux	26
Béthléhem	136
Béthléhem chante à ces sé	54
Bouanne Fête dé Noué	131
Lé Cantique dé Coventré	151
Lé Cantique dé la Sèrvelle dé Noué	147
Lé Cantique des Annimaux	160
Lé Cantique des Brandons	159
Lé Cantique du Coucou	117
Lé Cantique du Pommyi	126
Cantique du Sussex	33
Lé Cantique du Tchoeuryi	146
Lé Cantique du Vièr Noué	155
Ch'est la Sèrvelle dé Noué!	80
La Chanson d'Noué (Y'a des mârrons à rôti sus l'feu)	154
Les clioches dé Noué	143
Clyînclias! Clyînclias!	101
Couochi dans eune êtabl'ye	84
Craûle douochement, bèr	140
D'main	36
Dans la Cité du Rouai Dâvi	32
Dans la vielle ville du Rouai Dâvi	56
Dansons lé tou dé l'arb' dé Noué	148
Donne-mé man Noué aniet	133
Dors saint êfant	60

Les Douze Jours dé Noué	22
Drélîndgettes	87
L'Êfant à Béthléhém	96
En Galilée i' nos est dit	138
Êtaile du ciel	46
Êtailes, êtailes	58
Lé Fis d'Marie	50
Habil'-ous don!	72
Eune hardi bouonne bordée d'Noué	109
Hèque Saint Nicolas!	98
Lé housse et lé hierru	12
I' tchait d'la né	62
Ideo Gloria in Excelsis Deo	20
J'îthons chantant à Béthléhem	114
J'ouïs les belles clioches du Jour dé Noué	75
J'sommes trais Mages	52
J'vos souhaitons un jouaiyeux Noué	10
J'voudrais qu'ché sait châque jour lé jour dé Noué	152
J'y chantons not' hodgîngnole	130
Jé m'rad'dai siez mé ches Noué	157
Jé vai les vailes dé trais batchieaux	66
Jésû Christ lé bieau pommyi	76
Jésû est né	38
Jésû est né!	106
Jésû veint au haut dg'ieau	149
Lô-lô achteu p'tit Jésû	121
Un Lô-lô d'Noué	125
Man tambour	59
Mé, j'voudrais vaie un bieau blianc Noué	145
Mînniet, Chrêtchiens	105
Né v'chîn les papillons dé né	111
Nos v'chîn dans la ville d'Dâvi	94
Ouai-tu la sonn'nie céleste?	35
Les ouaîsieaux dans lé gardîn	128
Ouïy'-ous la chanson dé jouaie?	68

Ouïy'-ous, ouïy'-ous, gardeurs d'brébis?	116
Papa Noué s'en veint en Jèrri	82
Par les chénolles crève-tchoeu	118
Paradis d'hivé	65
Parmi la g'lée d'hivé	16
Pétite âne	70
O pétite ville dé Béthléhem	42
Prans du housse	27
Lé preunmié Noué	18
Qu'i' tchaie d'la né, tchaie d'la né, tchaie d'la né	142
Quand un p'tchiot est né	113
Qué Dgieu vos garde heutheurs, bouannes gens	14
Rêjouiss'-ous tous!	64
Rêvil'-ous touos!	108
Rudolf lé chèr au rouoge nez	49
Saûticotons à Béthléhem	78
Sav'-ous comme tchi craît' des arb's dé Noué?	156
Sonne les clioches	34
Sus l'coup d'mînniet les bèrgers ouîtent	30
Taîs'-ous, taîs'-ous, viyiz lé p'tit êfant	44
Tch'est qui s'est pâssé à ces sé?	134
Oh tchi douoche niet	11
Tout chein qué j'veurs chu Noué est té	89
Trais rouais d'l'Êst, hoummes avisés	139
Vé-t-en, bouoillon dé toute bouônté	104
Viyiz, blianc dans les bonds d'né	97
V'là qu'ou r'quémenche, la saîson dé nos rêjoui	150
Oh, v'nez, oh v'nez, Emmanuel	8
Oh v'nez, touos les fidèles	6
Îndex dé titres dans les langues originnales	162

Oh v'nez, touos les fidèles

Oh v'nez, touos les fidèles,
Jouaiyeurs et triomphants!
V'nez, v'nez, oh, v'nez, v'nez à Bethléhem.
Viyiz lé né,
Rouai dé touos les anges.
Oh v'nez, v'nez l'adouother,
Oh v'nez, v'nez l'adouother,
Oh v'nez, v'nez l'adouother,
Christ lé Rouai!

Dgieu dé Dgieu, Lueu dé Lueu, Dé la Sainte Vièrge, il est né Lé vrai Dgieu, Né pouor nous, pas créé. Oh v'nez, v'nez l'adouother, Oh v'nez, v'nez l'adouother, Oh v'nez, v'nez l'adouother, Christ lé Rouai!

Mages, m'nés par l'êtaile, Adouothant l'Saint Êfant, Li donnent d'l'enchens, d'l'or et d'la myrrhe. À ch't êfant Jésû, Nous, j'offrons nos tchoeurs. Oh v'nez, v'nez l'adouother, Oh v'nez, v'nez l'adouother, Oh v'nez, v'nez l'adouother, Christ lé Rouai! Laîssant lus troupieaux, Les bèrgers sont app'lés. Humbliément don i' s'en vont jusqu'au bèr. D'un pas jouaiyeux, J'y hâtons étout. Oh v'nez, v'nez l'adouother, Oh v'nez, v'nez l'adouother, Oh v'nez, v'nez l'adouother, Christ lé Rouai!

Chantez des cantiques,
Anges et hoummes ensemb'lye!
Auve les vouaix dé touos les tchoeurs célestes:
"Glouaithe sait à Dgieu,
Dans les pus hauts lieux!"
Oh v'nez, v'nez l'adouother;
Oh v'nez, v'nez l'adouother;
Oh v'nez, v'nez l'adouother;
Christ lé Rouai!

Lé Nouvieau-né Tch'appathut aniet, Jésû, la glouaithe sait à té: Du Péthe Êtèrnel, La Pathole en chai. Oh v'nez, v'nez l'adouother, Oh v'nez, v'nez l'adouother, Oh v'nez, v'nez l'adouother, Christ lé Rouai!

Oh, v'nez, oh v'nez, Emmanuel

Oh, v'nez, oh v'nez, Emmanuel!
Achteu libéthez Israël
Tchi gronne et plieuthe à san tout seu,
Sépathé du Fis dé Dgieu.
Tchi jouaie! Tchi jouaie!
Emmanuel
Est né pour té,
Oh Israël!

Oh, v'nez, oh v'nez, oh Sinne dé Jeu!
Oh v'nez et êcliaithiz-nous achteu!
Cachiz les néthes nues d'la niet
Et touos les ombres tchi nouos êffraient.
Tchi jouaie! Tchi jouaie!
Emmanuel
Est né pour té,
Oh Israël!

Oh, v'nez, oh v'nez, Réchinne d'Isaï! Dé d'ssous les pids d'la tyrannie, Et des terreurs d'la fôsse et d'l'enfé Saûvez tan peupl'ye et m'nez-les. Tchi jouaie! Tchi jouaie! Emmanuel Est né pour té, Oh Israël!

Oh, v'nez, oh v'nez, Êtèrnel Dgieu, La majesté et glouaithe des cieux! À Sinaï, sus l'saint coupé, Tu donnis à tan peupl'ye tes louais. Tchi jouaie! Tchi jouaie! Emmanuel Est né pour té, Oh Israël!

J'vos souhaitons un jouaiyeux Noué

J'vos souhaitons un jouaiyeux Noué-é, J'vos souhaitons un jouaiyeux Noué-é, J'vos souhaitons un jouaiyeux Noué-é, Et eune heûtheuse année! Jé chantons ichîn Pouor touos nos anmîns, J'vos souhaitons un jouaiyeux Noué-é, Et eune heûtheuse année!

Et j'aim'thons mangi du podîn Et j'aim'thons mangi du podîn Et j'aim'thons mangi du podîn Faut nos en donner! Jé chantons ichîn Pouor touos nos anmîns, J'vos souhaitons un jouaiyeux Noué-é, Et eune heûtheuse année!

Oh tchi douoche niet

Oh tchi douoche niet! oh tchi sainte niet! Tout est calme, tout est bé. Viy'ous la Méthe Vièrge dévant San pétit, chu Saint Êfant? Dors en paix céleste, Dors en paix céleste!

Oh tchi douoche niet! oh tchi sainte niet! Rouais et bèrgers veinnent Lé vaie. L'air est pliein dé cantiques jouaiyeux Chantés par les anges ès cieux: Christ, not' Saûveux est né, Christ, not' Saûveux est né!

Oh tchi douoche niet! oh tchi sainte niet! Tout est calme, tout sé tait. Viy'-ous ch't Êfant adouothabl'ye Couochi dans eune pouôrre êtabl'ye? Ch'est lé Fis dé Dgieu, Ch'est lé Fis dé Dgieu!

Oh tchi douoche niet! oh tchi sainte niet! L'êtaile lit, tout est cliai. L'Êfant dort en paix et souôrit. J'trouv'thons not' salut en Li: Christ au monde est donné, Christ au monde est donné!

Lé housse et lé hierru

Lé bieau housse et lé hierru Quand i' sont touos bein crus, Dé-é touos les bouais tchi sont d'la forêt Ch'est l'housse qué j'aimons l'mus.

Lé solé l'vant lé matîn, La vaque, l'âne et lé boeu, Les-es chansons d'Noué jouées sus l'orgue, La-a belle chant'tie du tchoeu!

Lé housse, i' craît des rouoges pommes Tchi sont bein amièrties, E-et Marie fit naître Jésû Tchi-i nos donnit sa vie.

Lé solé l'vant lé matîn, La vaque, l'âne et lé boeu, Les-es chansons d'Noué jouées sus l'orgue, La-a belle chant'tie du tchoeu! Lé housse, i' craît eune p'tite flieur Tchi est blianche comme la né E-et Marie fit naître Jésû Pou-our sauver té et mé

Lé solé l'vant lé matîn, La vaque, l'âne et lé boeu, Les-es chansons d'Noué jouées sus l'orgue, La-a belle chant'tie du tchoeu!

Lé housse, il a des pitchets I' faut qué j'prannons soin, E-et Marie fit naître Jésû Lé jour dé Noué, l'matîn.

Lé solé l'vant lé matîn, La vaque, l'âne et lé boeu, Les-es chansons d'Noué jouées sus l'orgue, La-a belle chant'tie du tchoeu!

Qué Dgieu vos garde heutheurs, bouannes gens

Qué Dgieu vos garde heutheurs, bouannes gens, I' faut bein célébrer!
Vous souv'n'-ous qué Christ, not' Saûveux,
Fut né, chutte fête dé Noué,
À seule fîn d'nos saûver du dgiâbl'ye,
Pardonner nos péchés?
Tchi nouvelles dé bonheu et jouaie,
Bonheu et jouaie,
Tchi nouvelles dé bonheu et jouaie!

Et Dgieu, not' Péthe, envyit un ange Tch'appathut dans lé ciel, Et r'contit à cèrtains bèrgers Chutte mèrveilleuse nouvelle: Qué dans la ville dé Bethléhem Fut née eune vraie mèrvelle. Tchi nouvelles dé bonheu et jouaie, Bonheu et jouaie, Tchi nouvelles dé bonheu et jouaie! Les bèrgers ouîtent les mots dé l'ange, Tchi les remplyîtent d'esprit. I' laîssîtent trantchil'yes dans les clios Lus troupieaux dé brébis, Et i' trouvîtent à Bethléhem Lé Fis dé Dgieu couochi. Tchi nouvelles dé bonheu et jouaie, Bonheu et jouaie, Tchi nouvelles dé bonheu et jouaie!

Bouannes gens, au Seigneu chantez bein! Vous, Madanme! Vous, Moussieu! Et embraichiz la compangnie, Châque anmîn, fréthe et soeu! Ch'est la belle fête jouaiyeuse dé Noué Qué j'célébrons achteu. Tchi nouvelles dé bonheu et jouaie, Bonheu et jouaie, Tchi nouvelles dé bonheu et jouaie!

Parmi la g'lée d'hivé

Parmi la g'lée d'hivé
I' ventait si fraid.
L'ieau coumme d'la pièrre sembliait,
La tèrre coumme du fé.
I' tchiyait d'la né sus né,
Né sus né.
Parmi la g'lée d'hivé
Y'a bein des années.

Ni chu monde ni l'Paradis N'est trop humbl'ye pouor Li. Dgieu aime tant l'monde entchi Qu'I' donnit San Fis. Parmi la g'lée d'hivé, L'êtabl'ye 'tait assez Pouor not' Dgieu, Rouai des Rouais -Chu p'tit saint bébé.

Tch'est qué j'peurs Lî donner, Eune pouôrre âme coumme mé? Si j'tais iun des bèrgers, J'donn'nais un angné. Si j'tais iun des Trais Rouais, Jé Lî f'thais honneu. Tout chein qué j'peurs donner, Jé Lî donne - man tchoeu.

O Arbre dé Noué

O Arbre dé Noué! O Arbre dé Noué! Tes fielles sont tréjous auve mé. O Arbre dé Noué! O Arbre dé Noué! Tes fielles sont tréjous auve mé. I' sont belles et vèrtes en Êté Et acouo quand i' tchait d'la né. O Arbre dé Noué! O Arbre dé Noué! Tes fielles sont tréjous auve mé.

O Arbre dé Noué! O Arbre dé Noué! Tchi bonheu dans ta bieauté! O Arbre dé Noué! O Arbre dé Noué! Tchi bonheu dans ta bieauté! Tu'es tréjous à nos faithe penser À la niet quand Jésû fut né. O Arbre dé Noué! O Arbre dé Noué! Tchi bonheu dans ta bieauté!

O Arbre dé Noué! O Arbre dé Noué! Ta forche est coumme San pouvé. O Arbre dé Noué! O Arbre dé Noué! Ta forche est coumme San pouvé. Il enduthe à l'êtèrnité Craîssant en amour et espé. O Arbre dé Noué! O Arbre dé Noué! Ta forche est coumme San pouvé.

Lé preunmié Noué

Lé preunmié Noué qué l'ange annoncit 'Tait à cèrtains pouôrres bèrgers ès clios couochis, Ès clios couochis, gardant lus brébis Par eune fraide niet d'hivé tch'était approfondie. Noué, Achteu lé Rouai d'Israël est né!

I' vîtent dans l'ciel eune grande êtaile Et sus chu monde, la lueu 'tait belle. Dé liain ou v'nait, dé l'êst ou lithait Et la glouaithe continnuait jour et niet. Noué, Noué, Noué, Noué, Noué, Noué, Achteu lé Rouai d'Israël est né! Et par la lueu d'l'étaile tchi lithait Trais Mages dé difféthents pays vénaient. Lus întention 'tait d'chèrchi un rouai Et d'siéthe l'êtaile là où'est qu'oulle allait. Noué, Noué, Noué, Noué, Noué, Noué, Noué, Achteu lé Rouai d'Israël est né!

L'êtaile s'appraichit du nord-vouêt Et à Bethléhem apportit grande jouaie, Et là ou s'arrêtit et restit Là où'est qué not' Jésû Christ 'tait couochi. Noué, Noué, Noué, Noué, Noué, Noué, Noué, Achteu lé Rouai d'Israël est né!

Ideo Gloria in Excelsis Deo

Lé monde a ouï aniet Les cantiques et les vouaix D's êfants tchi chantent dé jouaie, Car not' Saûveux fut né Par lé Bouan Dgieu donné: Ideo-o-o, Ideo-o-o, Ideo Gloria in Excelsis Deo

Dans chu monde I' fut né, Dans du langeu fretté, Dans un tro, I' dormait Auve les bêtes dé l'êtabl'ye, Hors lé pouver du dgiâbl'ye: Ideo-o-o, Ideo-o-o, Ideo Gloria in Excelsis Deo

Les trais Mages y vénaient, Chèrchant pouor chu Bébé, Chèrchant pouor chu Bébé. L'êtaile les attithait Pouor lé P'tit admither: Ideo-o-o, Ideo-o-o, Ideo Gloria in Excelsis Deo

Les minnistres et les gens, Auve les anges et l's êfants, Chantons touos lé même chant: Dans chu monde Tu d'cendis, I' nos faut Té louangi! Ideo-o-o, Ideo-o-o, Ideo Gloria in Excelsis Deo

Anges des régions dé la glouaithe

Anges des régions dé la glouaithe, Pâssez par-'chîn à ces sé. Ou racontez toute l'histouaithe Coumment not' Saûveux est né. Gloria in excelsis Deo!

Dans les clios i' y'a des bèrgers, Châtchun gardant san troupé. Dgieu ès hoummes est v'nu démeuther; Adouothons chu saint bébé. Gloria in excelsis Deo!

Mages, laîssiz vos contempliâtions; Y'a dé pus grande împortance. Chèrchiz don lé d'si des nâtions; L'êtaile annonce sa naîssance. Gloria in excelsis Deo!

Les Douze Jours dé Noué

Lé preunmié jour dé Noué Man galant m'a donné Un pèrdrix Saint-Ouënnais!

Lé deuxième jour dé Noué Man galant m'a donné Deux colombes d'Grouville, Et un pèrdrix Saint-Ouënnais!

Lé traîsième jour dé Noué Man galant m'a donné Trais poules d'Saint Jean, Deux colombes d'Grouville, Et un pèrdrix Saint-Ouënnais!

Lé quatrième jour dé Noué Man galant m'a donné Quat' pies d'Saint Martîn, Trais poules d'Saint Jean, Deux colombes d'Grouville, Et un pèrdrix Saint-Ouënnais!

Lé chîntchième jour dé Noué Man galant m'a donné Chîn bagues d'la Ville Quat' pies d'Saint Martîn, Trais poules d'Saint Jean, Deux colombes d'Grouville, Et un pèrdrix Saint-Ouënnais! Lé siêxième jour dé Noué Man galant m'a donné Siêx pithots d'Saint Brélade, Chîn bagues d'la Ville Quat' pies d'Saint Martîn, Trais poules d'Saint Jean, Deux colombes d'Grouville, Et un pèrdrix Saint-Ouënnais!

Lé septchième jour dé Noué Man galant m'a donné Sept cŷngnes d'Saint Cliément, Siêx pithots d'Saint Brélade, Chîn bagues d'la Ville Quat' pies d'Saint Martîn, Trais poules d'Saint Jean, Deux colombes d'Grouville, Et un pèrdrix Saint-Ouënnais!

Lé huitchième jour dé Noué Man galant m'a donné Huit vaques d'Sainte Mathie, Sept cŷngnes d'Saint Cliément, Siêx pithots d'Saint Brélade, Chîn bagues d'la Ville Quat' pies d'Saint Martîn, Trais poules d'Saint Jean, Deux colombes d'Grouville, Et un pèrdrix Saint-Ouënnais! Lé neuvième jour dé Noué Man galant m'a donné Neu tonmates d'Saint Saûveux, Huipt vaques d'Sainte Mathie, Sept cŷngnes d'Saint Cliément, Siêx pithots d'Saint Brélade, Chîn bagues d'la Ville Quat' pies d'Saint Martîn, Trais poules d'Saint Jean, Deux colombes d'Grouville, Et un pèrdrix Saint-Ouënnais!

Lé dgiêxième jour dé Noué Man galant m'a donné Dgiêx patates d'Saint Louothains, Neu tonmates d'Saint Saûveux, Huit vaques d'Sainte Mathie, Sept cŷngnes d'Saint Cliément, Siêx pithots d'Saint Brélade, Chîn bagues d'la Ville Quat' pies d'Saint Martîn, Trais poules d'Saint Jean, Deux colombes d'Grouville, Et un pèrdrix Saint-Ouënnais! Lé onzième jour dé Noué
Man galant m'a donné
Onze danmes d'la Trinn'té,
Dgiêx patates d'Saint Louothains,
Neu tonmates d'Saint Saûveux,
Huit vaques d'Sainte Mathie,
Sept cŷngnes d'Saint Cliément,
Siêx pithots d'Saint Brélade,
Chîn bagues d'la Ville
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Lé douzième jour dé Noué
Man galant m'a donné
Douze mêssieurs d'Saint Pièrre,
Onze danmes d'la Trinn'té,
Dgiêx patates d'Saint Louothains,
Neu tonmates d'Saint Saûveux,
Huit vaques d'Sainte Mathie,
Sept cŷngnes d'Saint Cliément,
Siêx pithots d'Saint Brélade,
Chîn bagues d'la Ville
Quat' pies d'Saint Martîn,
Trais poules d'Saint Jean,
Deux colombes d'Grouville,
Et un pèrdrix Saint-Ouënnais!

Des bèrgers gardaient lus troupieaux

Des bèrgers gardaient lus troupieaux, Paisibliément assis, Quand l'Ange du Seigneur décendit Et la niet s'êcliaithit.

"I' n'faut pas craindre" I' lus dit, "Ni vos troublier l's esprits, Dé bouannes nouvelles jé vos apporte, Pouor toute l'humannité"

"Pouor vous aniet à Bethléhem, Un Saûveux vos est né; Et chu Saûveux, ch'est Jésû Christ, Et ch'en est 'chîn la preuve:

L'Êfant céleste ou trouv'thez Ilà en veue d'tout l'monde, Et bein pouôrrement enmailloté Dans eune crèche à dormi."

Aussitôt dit, il appathut Dans l'ciel des anges brillants, Qui louangeaient l'Bouan Dgieu jouaiyeusement, En chantant auve ches mots:

"Glouaithe au Bouan Dgieu dans les lieux hauts. Et paix sainte sus la tèrre; Bouanne volanté envèrs les hoummes D'achteu à tout janmais!"

Prans du housse

Prans du housse pouor décorâtion, Fa la la la la la la la! Ch'est lé jour dé célébrâtion, Fa la la la la la la la! J'veurs du vîn; donne-mé eune vèrrée, Fa la la la la la la la! Célébrons chutte jouaiyeuse séthée, Fa la la la la la la la!

Y'a du pantch et y'a du podîn, Fa la la la la la la la! Y'a d'la gâche et y'a du chaûdé, Fa la la la la la la la! Chante auve mé, ensembl'ye chantons, Fa la la la la la la la! Baivons, mangeons, rions, dansons, Fa la la la la la la la!

Atout jouaie dans l'temps jadis

Atout jouaie dans l'temps jadis, L's anciens tch'étaient rêvilyis Vîdrent là lueu d'la belle êtaile Tch'êcliaithait lé c'mîn du Ciel; O Bouan Dgieu, donne-nous l'avis Dé Té siéthe toute nouot' vie.

Comme i' suivîdrent la lueu
Tchi les m'nit jusqu'au Saint Lieu,
Ou'est tch'i' pûdrent lus agenouoilli,
Pour adouother l'Chièr Pétit
Tchi d'vînt pus tard lé Saûveux
Dé toutes âmes souos les Cieux.

Il' apportîdrent des présents Dé grand' valeu, et d'l'enchens; Ch'est à nous dé siéthe lus pas, Et d'nouos comporter 'chîn bas, D'manniéthe à Lî présenter Nouot' amour et nouot' respé. O chièr Jésû, à châque jour, Veil'yes sus nous avec amour, Et à l'heuthe du drein soupi Èrchai-nous dans l'Paradis Où'est tch'i' n'y'a plieurs ni mînséthes, Dans la glouaithe dé Tan sanctuaithe.

Là, dans l'bonheu et la jouaie, Matîn, méjeu, arlévée, Dé Ta présence, et des anges, J'pouôrrons T'offri nouos louanges Et chanter l's allélûias Auve lé Sanctus d'ichîn bas.

Sus l'coup d'mînniet les bèrgers ouîtent

Sus l'coup d'mînniet les bèrgers ouîtent Chu vièr chant glorieux; Des anges qu'i' s'penchaient vèrs la tèrre, Jouant lus harpes d'or; "Paix sus la tèrre, bouanne volanté Ès hoummes, du Tout Puissant" Lé monde entchi dévînt trantchil'ye Pour ouï lé chant des anges.

Acouothe i' veinnent travèrs les cieux, Lus ailes paîsibl'yes ouvèrtes; Et lus musique sainte et céleste Sonne si douoche sus la tèrre. En d'sus ses pliaines et ses montangnes Grâcieuses i' vont et veinnent; Et tréjous par sus l'brit des hoummes Les anges heutheuses chantent. O vous, souos l'fardé dé la vie Courbés dé vos mînséthes, Vous qui peinez sus vot' quémîn À pas pénibl'yes et longs; Couothage, pour vous bonheu et jouaie D'cendant sus d's ailes des cieux. Èrpos'-ous don dé temps en temps Pour ouï lé chant des anges.

V'là don! lé temps bein vite s'envole, Coumme les prophètes disaient; Auve châque siècl'ye nou-s-appraiche du jour Quand touos s'sont rêunnis; Quand j'connaîtrons la Paix suprême En touos lieux, en touos âges, Et qu'cieux et tèrre résonn'nont Au chant des hoummes et anges.

Dans la Cité du Rouai Dâvi

Dans la Cité du Rouai Dâvi, Sé trouvait eune vielle êtabl'ye: Où'est qu'eune méthe posit san p'tit êfant Dans eune crèche à rempliaichi san liet. Mathie Sainte, Méthe bénie Et san fis, ch'est Jésû Christ.

I' vînt du ciel sus la tèrre, Dgieu li-même, lé Tout-Puissant. Décendit dans eune êtabl'ye, Et san bèr n'était qu'eune stâlle. Auve les pauvres - les humbl'yes d'esprit; S'trouvait nouot' Saûveux Jésû Christ.

Dé nos ièrs enfîn jé l'vèrrons, Grâce à sén îmmense amour. Car ch't êfant si tendre et si doux, Ch'est nouot' Seigneu, nouot' Sécours. Touos ses êfants lé siéthont Et au ciel il' arriv'thont.

Pas dans eune êtabl'ye pauvre Auve les bestchiaux alentou d'li, Jé lé vèrrons, mais en glouaithe Assis à la drouaite dé Dgi, Quand, couronnés, touos en blianc, Ses êfants s'assembliéthont.

Cantique du Sussex

Lés Chrêtchiens chantent, chutte séthée d'Noué, Pour ouï ches nouvelles dé grande jouaie. Lés Chrêtchiens chantent, chutte séthée d'Noué, Pour ouï ches nouvelles dé grande jouaie. Dans les cieux appathaîssent des anges, Chantant, èrpétant lus louanges.

Et pouortchi qué j'devthons êt' triste, Quand j'fêtons la naîssance du Christ? Et pouortchi qué j'devthons êt' triste, Quand j'fêtons la naîssance du Christ? Quand not' Saûveux a libéthé Les hoummes d'la prison dé péché.

La lueu nos a illeunminné Et fit chanter les anges chutte niet, La lueu nos a illeunminné Et fit chanter les anges chutte niet, "Glouaithe céleste et paix humaine Achteu et pouor tréjous. Âmen."

Sa Grâce a chassé lé péché, Donnant la Vie et la Santé. Sa Grâce a chassé lé péché, Donnant la Vie et la Santé. Hoummes et anges, chantez auve jouaie, Pour saluer lé nouvieau rouai!

Sonne les clioches

Sonne les clioches, les p'tites clioches, sonne les clioches d'hivé,

Ah tchi fanne dé nos prom'ner ichîn dans la né -Sonne les clioches, les p'tites clioches, sonne les clioches d'hivé,

Ah tchi fanne dé nos prom'ner ichîn dans la né!

Veins-t-en auvec mé,
Driéthe man bidet.
Couvre les deux d'nous,
Cauds coumme des mouossons!
J'ithons nos prom'ner
À travèrs d'la né.
Êcoute man p'tit j'va tchi trotte,
Lié à man traîné!

Sonne les clioches, les p'tites clioches, sonne les clioches d'hivé,

Ah tchi fanne dé nos prom'ner ichîn dans la né -Sonne les clioches, les p'tites clioches, sonne les clioches d'hivé,

Ah tchi fanne dé nos prom'ner ichîn dans la né!

Ouai-tu la sonn'nie céleste?

Ouai-tu la sonn'nie céleste? Les anges sonnent les clioches au ciel. La chant'tie du Vouêt et d'l'Êst Nos annonce la bouonne nouvelle: Glouaithe, Hosanna ès pus hauts lieux! Gloria, Hosanna in excelsis!

Et ichîn bas les cliochièrs Font cârillon auve lus vouaix; Touos les jannes et touos les vièrs Louangent lé Seigneur auve grande jouaie: Glouaithe, Hosanna ès pus hauts lieux! Gloria, Hosanna in excelsis!

Écoutons à sinne dé jeu
Les belles matinnes des sonneurs
Au sé chu cantique heutheux
Nos rempliétha dé bonheu.
Glouaithe, Hosanna ès pus hauts lieux!
Gloria, Hosanna in excelsis!

D'main

D'main est l'jour dé Noué! Lé pus grand jour dé l'année! Et pour qu'tout s'sait prêt, J'veins d'aîdgi à M'mèe. J'avons décoré, Patchi des présents. Déhors i' gèle et fait d'la né; Ch'n'est pas d'même par dédans!

J'aime bein Noué! Ah, véthe-dgia! Auve touos les cadeaux, Apportés par Papa Noué Dans eune grand' pouque sus san dos. Sus man liet j'm'en vais pendre Eune cauche qu'est toute nette, Espéthant qué d'main matîn Ou s'sa remplyie dé belles jouettes.

M'mèe a fait l'podîn
Et eune belle grand' gâche dé Noué.
J'avons des châtaines
Pour rôti au feu,
Oranges et codrettes,
Des chucrîns étout;
Un gros picot qu'est prêt stoffé
Pour M'mèe à mettre au fou.

J'aime bein Noué! Ah, véthe-dgia! Auve touos les cadeaux, Apportés par Papa Noué Dans eune grand' pouque sus san dos. Sus man liet j'm'en vais pendre Eune cauche qu'est toute nette, Espéthant qué d'main matîn Ou s'sa remplyie dé belles jouettes.

Notre bouais dans la carre A des p'tites veues d'ssus étout, Et l'êtaile sus l'haut Touche presqué au pliafond! Mais l'pus împortant La cheunm'née fraîche nettie, Veurt dithe qué Papa Noué peut v'nîn Sans sali ses habits!

J'aime bein Noué! Ah, véthe-dgia! Auve touos les cadeaux, Apportés par Papa Noué Dans eune grand' pouque sus san dos. Sus man liet j'm'en vais pendre Eune cauche qu'est toute nette, Espéthant qué d'main matîn Ou s'sa remplyie dé belles jouettes.

Jésû est né

Louangiz lé Seigneur, Jésû est né; Car dans eune êtabl'ye l'êfant divîn Annoncé des anges, mèrtchi d'l'êtaile; Not' Saûveux fut né à Bethléhem!

Chantez auve les anges, chantez d'la paix, Qu'les cieux rétentissent d'amour et d'jouaie! Chantez auve les anges dé not' Saûveux! Êfant dé Marie, fis du Seigneur!

Les mages et bèrgers agenouoillis là, L'âne et les brébis, la biche, lé j'va, Adorant l'êfant sus l'fain couochi, La glouaithe du Bouan Dgieu lîsant l'tou d'li!

Chantez auve les anges, chantez d'la paix, Qu'les cieux rétentissent d'amour et d'jouaie! Chantez auve les anges dé not' Saûveux! Êfant dé Marie, fis du Seigneur! Bethléhem dormait, èrpos profond, Quand l's anges apportîtent à toutes nâtions, Nouvelle dé l'êfant; prannant sus li, Les péchés ênormes du monde entchi.

Chantez auve les anges, chantez d'la paix, Qu'les cieux rétentissent d'amour et d'jouaie! Chantez auve les anges dé not' Saûveux! Êfant dé Marie, fis du Seigneur!

Les anciens prophètes l'avaient prédit, Chu sé-là l'mithacl'ye fut accomplyi! Chantez vos cantiques à Dgieu aniet, Louangiz lé Seigneur, Jésû est né.

Chantez auve les anges, chantez d'la paix, Qu'les cieux rétentissent d'amour et d'jouaie! Chantez auve les anges dé not' Saûveux! Êfant dé Marie, fis du Seigneur!

À travèrs les montangnes

À travèrs les montangnes
Et du d'sèrt i' veinnent,
Les Mages savants et sages
À sa pouôrre humbl'ye d'meuthe
D'eune ardeur dêvouée
Dé liain il' arrivent
Pour suivre sans tchestchion
Eune êtaile coumme dgide.

Là lus Rouai, lus Saûveux, Couochi, humbl'ye et doux, Chutte veue qui les amène Tout du long d'lus viage, Pour êcliaithi tréjous Les nâtions au liain, Suivant lé c'mîn jouaiyeux Condis par l'êtaile. Té qui dans eune êtabl'ye Au monde arrivit, Qui achteu en glouaithe Sus touos rouoyaumes règne, Èrtchil'ye les pouôrres païens Des pays lointains Qui n'ont janmais veu lithe Ch't' êtaile sans patheille.

En avant toute la niet, Niet si seule et sombre, Auve Ta sainte leunmiéthe Lisant l'avant à ieux, Mène-les, Juis et Paens, Au r'pos êtèrnel, Jannes et vièrs étout Condis par T'n êtaile.

O pétite ville dé Béthléhem

O pétite ville dé Béthléhem
Tu'es couochie trantchilement.
Lé ciel èrlit sus tan dormi
Bein silencieusément.
Mais v'là tchi r'lit dans tes sombres rues
La leunmiéthe êtèrnelle,
L'êffrai, l'espé dé châque année
Lus r'trouvent souos ches êtailes.

Jésû est né d'la Vièrge Mathie!
Sus la tèrre coumme ès cieux,
Les hoummes au liet, les anges au dget,
Èrchèvent l'amour dé Dgieu.
Procliâmez, êtailes du matîn,
La naîssance du Saûveux!
Chantez auve jouaie à Dgieu, not' Rouai,
Qu'Sa paix sait ouïe achteu!

Bein trantchilement, bein trantchilement, La mèrvelle appathaît, Lé don dé Dgieu à châque humbl'ye tchoeu, Lé présent dé Sa paix. Jé n'ouïyons pon Sa tape à l'us Siez nous, des pouôrres pécheurs, Mais châque esprit tch'a fouai en Li Èrchait l'saint vîsiteur.

O p'tit êfant dé Béthléhem, Siez nous, Tu'es v'nu d'meuther. Hale tout hèrtchîn, et entre ichîn: Sai né en nous aniet. J'ouïyons l'assembliée angélique Tchi chante la bouonne nouvelle, Car il est v'nu, lé p'tit Jésû, Not' Rouai Emmanuel!

Taîs'-ous, taîs'-ous, viyiz lé p'tit êfant

Taîs'-ous, taîs'-ous, viyiz lé p'tit êfant
Tchi dort paisibliément dans chu bèr.
Ouïyiz les vouaix des anges et hoummes chantant
Là-haut dans lé Ciel et sus la Tèrre.
Car lé p'tit Jésû
À ces sé est v'nu!
Chu pouôrre p'tit êfant est lé Bouôn Dgieu!
Car ch'est man Saûveux
Et man Rédempteux,
Né dans eune êtabl'ye et dans man tchoeu.

Lé boeu né beûle pon et l'âne né brait pon À g'nouors dans lus stâlles louangeant lus Rouai. Agenouoill'-ous étout en contempliâtion Dé chutte séthée dé mèrvelles et jouaie. Car lé p'tit Jésû À ces sé est v'nu! Chu pouôrre p'tit êfant est lé Bouôn Dgieu! Car ch'est man Saûveux Et man Rédempteux, Né dans eune êtabl'ye et dans man tchoeu. D'valés des clios, y'a des gardeurs d'brébis. Des Mages ont apporté lus présents. Humbliément offrons, auve l'esprit rêjoui, Au p'tchiot nos louanges tchi montent coumme l'enchens.

Car lé p'tit Jésû À ces sé est v'nu! Chu pouôrre p'tit êfant est lé Bouôn Dgieu! Car ch'est man Saûveux Et man Rédempteux, Né dans eune êtabl'ye et dans man tchoeu.

Êtaile du ciel

Lé jour dé Noué
En gardant lus brébis,
Les bèrgers vîtent dans l'ciel
Un Ange tchi lus dit,
"Suivez tous l'êtaile,
À Bethléhem,
Et là-bas, ou trouv'thez
Un nouvieau né."

Êtaile du ciel, Si mangnifique et si brillante, Tchi mouontre lé c'mîn Jusqu'à l'êtabl'ye Où'est qu'est chu p'tit êfant. Chantez fidèles, dé tout bouan tchoeu, Pouor vot' Seigneur, lé Fis du Bouan Dgieu.

Les Mages dé l'Êst
Tchi travèrsaient la mielle,
En r'gardant vèrs lé ciel,
Vîtent étout l'êtaile
Et en la suivant
À Bethléhem
Y trouvîtent dans l'êtabl'ye
Lé p'tit êfant.

Êtaile du ciel, Si mangnifique et si brillante, Tchi mouontre lé c'mîn Jusqu'à l'êtabl'ye Où'est qu'est chu p'tit êfant. Chantez fidèles, dé tout bouan tchoeu, Pouor vot' Seigneur, lé Fis du Bouan Dgieu.

Les riches et pauvres,
Tout l'monde sé rêjouissant,
Vîntent mett' au pid d'la crèche,
Un tas d'bieau présents.
Et ses pathents,
Èrconnaîssant
Qué lus fis 'tait l'beinv'nu
À Bethléhem.

Êtaile du ciel, Si mangnifique et si brillante, Tchi mouontre lé c'mîn Jusqu'à l'êtabl'ye Où'est qu'est chu p'tit êfant. Chantez fidèles, dé tout bouan tchoeu, Pouor vot' Seigneur, lé Fis du Bouan Dgieu. Chantons sans cêsse, Et chantons nos louanges, Pouor lé Seigneur Jésû, Tch'est lé Rouai des Anges. Et par sa naîssance À Bethléhem I' nos donne jouaie du ciel, Paix sus la tèrre.

Êtaile du ciel, Si mangnifique et si brillante, Tchi mouontre lé c'mîn Jusqu'à l'êtabl'ye Où'est qu'est chu p'tit êfant. Chantez fidèles, dé tout bouan tchoeu, Pouor vot' Seigneur, lé Fis du Bouan Dgieu.

Rudolf lé chèr au rouoge nez

Rudolf lé chèr au rouoge nez Avait l'nez bein rouoge et long Et si ou l'viyez achteu Ou direz bein tchi 'n a deux d'gouts!

Touos les autres pétits chèrs Soulaient rithe et en faithe du fanne -I' n'laîssaient pas pouôrre Rudolf Jouer auve ieux et jouer lus gammes.

Mais eune belle sèrvelle dé Noué Papa Noué vînt en disant "Rudolf au nez rouoge et bé -Vens m'aîdgi auve les présents"

Achteu touos les chèrs l'aiment bein, Et touos ieux lus mettent à braithe: "Rudolf, lé chèr au rouoge nez Ch'est qu'tu fais eune belle histouaithe!"

Lé Fis d'Marie

Y'a bein longtemps à Bethléem, d'après chein qu'la Bibl'ye nos dit, lé fis d'Marie, Jésû Christ, fut né lé jour dé Noué.

Écoutez les Anges qui chantent, Un nouvieau Roué est né. Et l'homme vivra êtèrnellement à cause du jour dé Noué. Trompettes sonnent et les Anges chantent, Écoutez chein qu'i' dîsent: Qué l'homme vivra êtèrnellement à cause du jour dé Noué.

Gardant lus troupieaux à l'ouvèrt, Les bèrgers ouîtent un chant au liain, Vîtent eune êtaile parfaite Qui brillait dans lé ciel si bein. Et Joseph et sa femme Marie Vîntent à Bethléem chutte niet, Et n'pûtent pas trouver même eune chambre Où'est qu'l'êfant pouvait être né. Êcoutez les Anges qui chantent, Un nouvieau Roué est né. Et l'homme vivra êtèrnellement à cause du jour dé Noué. Trompettes sonnent et les Anges chantent, Êcoutez chein qu'i' dîsent: Qué l'homme vivra êtèrnellement à cause du jour dé Noué.

Bétôt i' trouvîtent un p'tit coin, Et là, dans eune êtabl'ye sombre, Auvec les bêtes pour compangnie, Jésû fut né au monde. Y'a bein longtemps à Bethléem, D'après chein qu'la Bibl'ye nos dit, Lé fis dé Marie, Jésû Christ, Fut né lé jour dé Noué.

Êcoutez les Anges qui chantent, Un nouvieau Roué est né. Et l'homme vivra êtèrnellement à cause du jour dé Noué. Trompettes sonnent et les Anges chantent, Êcoutez chein qu'i' dîsent: Qué l'homme vivra êtèrnellement à cause du jour dé Noué.

J'sommes trais Mages

Dé bein au liain j'avons viagi. J'sommes trais Mages, des rouais dé magie. Par la campangne et les montangnes Souotre eune êtaile tchi lit.

Oh tchi belle êtaile dans les cieux! Tchi nos dgid'da coumme eune veue Canté les Rouais, tréjous vèrs l'Vouêt, Condi-nous au Fis dé Dgieu!

J'ai dé l'or à lî présenter; J'allons lé couronner dèrché -Chu p'tit êfant tchi bein pouôrrement Dans eune êtabl'ye fut né.

Oh tchi belle êtaile dans les cieux! Tchi nos dgid'da coumme eune veue Canté les Rouais, tréjous vèrs l'Vouêt, Condi-nous au Fis dé Dgieu!

J'ai dé l'enchens dé tchi l'odeu monte auve nos priéthes au Bouôn Dgieu; Contempliâtion, adouothâtion, et louanges ès pus hauts lieux. Oh tchi belle êtaile dans les cieux! Tchi nos dgid'da coumme eune veue Canté les Rouais, tréjous vèrs l'Vouêt, Condi-nous au Fis dé Dgieu!

J'ai d'la myrrhe, tch'est forte et améthe Et tchi l'enfliub'tha coumme un suaithe; Souffrant, plieuthant, sangnant, mouothant, parfunmé du chînm'tchiéthe.

Oh tchi belle êtaile dans les cieux! Tchi nos dgid'da coumme eune veue Canté les Rouais, tréjous vèrs l'Vouêt, Condi-nous au Fis dé Dgieu!

Dé bein au liain j'avons viagi. J'sommes trais Mages, des rouais dé magie. Par la campangne et les montangnes Souotre eune êtaile tchi lit.

Oh tchi belle êtaile dans les cieux! Tchi nos dgid'da coumme eune veue Canté les Rouais, tréjous vèrs l'Vouêt, Condi-nous au Fis dé Dgieu!

Béthléhem chante à ces sé

Ouai lé bêlement d'brébis sus les côtis!
Ouai lé chant des anges ès cieux!
Coumme les anges et angnieaux sont à louangi:
"Glouaithe à Dgieu ès pus hauts lieux!"
D'eune vouaix d'ange et d'eune vouaix d'angné
Béthléhem lî chante à ces sé.
Ouai la rêponse des gardeurs dé brébis!
Ouai lus êcatchîn jouaiyeux!

Sié les gardeurs d'brébis dé d'dans les clios! Sié lus pas avaû les c'mîns! Coumme il' apportent un angné sus lus dos, y'a un angné tch'est à v'nîn. D'eune vouaix d'ange et d'eune vouaix d'angné Béthléhem lî chante à ces sé. Sié-les jusqu'ès bords du bèr au moussetchot! Sié-lé tréjous à l'av'nîn! Vai la ville où'est qu'lé saint p'tchiot est bèrchi! Vai l'êtabl'ye où'est qu'i' fut né! Coumme l'âne et l'boeu sont à lus agenouoilli, il est v'nu pouor nos saûver. D'eune vouaix d'ange et d'eune vouaix d'angné Béthléhem lî chante à ces sé. Vai-lé acanté Joseph et Mathie! Vai not' Saûveux, not' espé!

Sai heutheux en apportant tes présents!
Sai fidèle et génétheux
Coumme les rouais auve la myrrhe, l'or et l'enchens, offre-lî tréjous du miyeu!
D'eune vouaix d'ange et d'eune vouaix d'angné
Béthléhem lî chante à ces sé.
Sai tréjous not' trésor, oh saint êfant!
Sai tréjous siez nous dans l'tchoeu!



Dans la vielle ville du Rouai Dâvi

Ouïyons auve les gardeurs d'brébis les cantiques des anges ès cieux! Allons, acanté ieux, vilyi sus l'êfant tch'est l'Fis dé Dgieu!

Dans la vielle ville du Rouai Dâvi y'a eune lueu tch'êcliaithe la niet; eune êtînchelle dé fouai satchie dans not' tchoeu, chutte séthée d'Noué.

Viyons endormi dans l'fêtu, êcliaithi par eune sainte lueu, né dans l'êtabl'ye, lé p'tit Jésû tch'est bèrchi siez l'âne et l'boeu.

Dans la vielle ville du Rouai Dâvi y'a eune lueu tch'êcliaithe la niet; eune êtînchelle dé fouai satchie dans not' tchoeu, chutte séthée d'Noué. Les Trais Mages ont r'mèrtchi l'étaile; i' l'ont r'connu, i' l'ont sieu. Séyons sages et tréjous fidèles, siêthant l'étaile au Saûveux!

Dans la vielle ville du Rouai Dâvi y'a eune lueu tch'êcliaithe la niet; eune êtînchelle dé fouai satchie dans not' tchoeu, chutte séthée d'Noué.

Jour dé paix et d'célébrâtion, jour dé jouaie et dé bonheu! Lé Bouôn Dgieu êcliaithe les nâtions, et j'viyons not' Rédempteu!

Dans la vielle ville du Rouai Dâvi y'a eune lueu tch'êcliaithe la niet; eune êtînchelle dé fouai satchie dans not' tchoeu, chutte séthée d'Noué.

Air: Cantique 73, Recueil de Cantiques Méthodiste, 1889



Étailes, étailes

À Béthléhem, les gardeurs dgettent lus brébis sus les côtis, dans la niet si fraide et néthe. Mais eune êtaile lit sus la ville dé Dâvi, et v'là tchi d'vale sus ieux la lueu d'la glouaithe. Étailes, êtailes, si cliaithes dans la niet; Étailes, êtailes, êcliaithiz not' Noué!

Un tchoeu céleste a êgalué la séthée; toutes les êtailes auve eune constellâtion d'anges. Coumme il' èrlithent, la mélodie êtailée pétil'ye à haut pouor înspither nos louanges. Étailes, êtailes, si cliaithes dans la niet; Étailes, êtailes, êcliaithiz not' Noué!

Sus lus chanmeaux, ava et amont les mielles souotre un m'sagi d'là-haut l'avant à lus ièrs. Viageant tréjous à la siette d'eune grand' êtaile, né v'là les Mages tchi veinnent, crouaîsant lé d'sèrt. Êtailes, êtailes, si cliaithes dans la niet; Êtailes, êtailes, êcliaithiz not' Noué!

Par sus la ville, eune êtaile est à mèrtchi qu'à Béthléhem un Saûveux nous est donné. Y'a dans l'êtabl'ye dans tchi l'êfant est bèrchi d'l'enchens, d'la myrrhe, et d'l'or tchi lit si bé. *Êtailes, êtailes, si cliaithes dans la niet; Êtailes, êtailes, êcliaithiz not' Noué!*

Air: Cantique 86, Recueil de Cantiques Méthodiste, 1889



Man tambour

Vein, i' m'dîtent, vaie, pa-rum pa pum pum, Lé Rouai qui veint dé naitre, pa-rum pa pum pum Tout lé miyeu qu'j'avons, pa-rum pa pum pum, A Li faut qu'j'lé portons, pa-rum pa pum pum rum pa pum pum rum pa pum pum Car j'Lé louangeons, pa-rum pa pum pum, Au d'ssus d'tout.

Pétit Jésû, pa-rum pa pum pum, Jé n'sis qu'un pouôrre garçon, pa-rum pa pum pum, J'n'ai rein qué j'peux T'donner, pa-rum pa pum pum, Qu'est dîngne pour un Rouai, pa-rum pa pum pum rum pa pum pum rum pa pum pum, Dé même j'jouerrai pour Té, pa-rum pa pum pum, Man tambour.

Marie souôrit, pa-rum pa pum pum L'angné et l'âne étout, pa-rum pa pum pum, Jé fis man mus pour Li, pa-rum pa pum pum, J'jouis man tambour pour Li, pa-rum pa pum pum rum pa pum pum rum pa pum pum, Et pis I' m'souôrit, pa-rum pa pum pum Lé P'tit Jésû.

Dors saint éfant

Les gardeurs vil'yent sus lus brébis; et l's êtailes lithent sus les clios. Eune méthe èrgarde san p'tit êfant; et l'péthe graie san liet dans l'tro.

Dors saint êfant; dors trantchil'yement dans tan bèr siez l'âne et l'boeu. Dors p'tit Jésû; tu'es not' salut: Not' angné s'sa not' gardeux.

Les gardeurs ouaient sus les montangnes un tchoeu chantant dans les cieux d'un mousse né dans eune pouôrre êtabl'ye: lé p'tchiot tch'est lé Fis dé Dgieu.

Dors saint êfant; dors trantchil'yement dans tan bèr siez l'âne et l'boeu. Dors p'tit Jésû; tu'es not' salut: Not' angné s'sa not' gardeux. Les gardeurs, laîssant lus troupieaux, d'valant la raide caramiéthe lus agenouôlent l'avant à l'êfant, êcliaithis par sa sainte glouaithe.

Dors saint êfant; dors trantchil'yement dans tan bèr siez l'âne et l'boeu. Dors p'tit Jésû; tu'es not' salut: Not' angné s'sa not' gardeux.

Les gardeurs, rêjouis d'la mèrvelle, ont siévi les vouaix ès anges. Chantons étout au p'tit Saûveux, lé bèrchant atout nos louanges.

Dors saint êfant; dors trantchil'yement dans tan bèr siez l'âne et l'boeu. Dors p'tit Jésû; tu'es not' salut: Not' angné s'sa not' gardeux.



l' tchait d'la né

I' tchait d'la né et Bethléhem est bein gliaichi mais i' fait bé dans l'bèr où'est qu'l'êfant est pliaichi.

Dans la né, p'tit avé; dors en paix toute la niet. Dors en paix toute la niet, p'tit avé dans la né.

I' tchait d'la né ès clios où'est qu'des gardeurs d'brébis êmèrvilyis ont ouï l'ange du Seigneu prêchi.

Dans la né, p'tit avé; dors en paix toute la niet. Dors en paix toute la niet, p'tit avé dans la né. I' tchait d'la né; des rouais sont à lus appréchi auve lus présents pouor lé p'tchiot si précieux et chi.

Dans la né, p'tit avé; dors en paix toute la niet. Dors en paix toute la niet, p'tit avé dans la né.

Air: Cantique 117, Recueil de Cantiques Méthodiste, 1889



Réjouiss'-ous tous!

Rêjouiss'-ous tous! Né v'chîn l'Seigneu! Les anges lé chantent dans l'air: Glouaithe sait à Dgieu dans l'haut des cieux Et paix sainte sus la tèrre.

Rêjouiss'-ous tous! I' règne à haut! Chantez dans touos les pays! Qu'les monts et grèves, les prés et ieaux Èrpètent lus chants dé jouaie!

Qu'lé nièr péché né craîsse pus d'aut' Ni sèrcl'yes né craîssent ès clios! I' nos lav'tha dé toutes nos fautes Pouor dgéthi touos nos maux.

I' règne en grâce et véthité Sus tous, et riches et pouôrres, En offrant à l'humannité Les mèrvelles dé S'n amour.

Paradis d'hivé

Les clioches sonnent — les entend'-ous? Dans les clios près d'siez-nous Tout couvèrts dé né — Nou dit qu'ch'est bé Dé marchi dans not' paradis d'hivé.

Bein au liain sont les héthondes, Liain dé chu nouvieau blianc monde. Jé dithons ensembl'ye, Jé rithons ensembl'ye Ichîn dans not' paradis d'hivé.

Dans not' gardîn, j'allons faithe un bouanhomme Dé né auve ses deux ièrs dé tchèrbon. I' s'en va nos d'mander où'est qué j'allons, Et j'allons dithe "Autchun bord" tout ensembl'ye.

Bein pus tard, touos êssoûffliés Et assis près d'la fouée À nos caûffer les dés, J'dithons en jouaie Qu' j'avons un vrai paradis d'hivé.

Jé vai les vailes dé trais batchieaux

Jé vai les vailes dé trais batchieaux, Chutte fête dé Noué, chutte fête dé Noué, Jé vai les vailes dé trais batchieaux, Chutte fête dé Noué, lé matîn.

Et tch'est qu'i' y'a dans ches batchieaux, Chutte fête dé Noué, chutte fête dé Noué? Et tch'est qu'i' y'a dans ches batchieaux, Chutte fête dé Noué, lé matîn?

Jésû, not' Sauveur et sa Danme, Chutte fète dé Noué, chutte fète dé Noué, Jésû, not' Sauveur et sa Danme, Chutte fête dé Noué, lé matîn.

Et iou qu'i' vont, ches trais batchieaux, Chutte fête dé Noué, chutte fête dé Noué? Et iou qu'i' vont, ches trais batchieaux, Chutte fête dé Noué, lé matîn? O i' s'en vont à Bethlehem, Chutte fête dé Noué, chutte fête dé Noué. O i' s'en vont à Bethlehem, Chutte fête dé Noué, lé matîn.

Et toutes les clioches, i' vont sonner, Chutte fête de Noué, chutte fête de Noué, Et toutes les clioches s'en vont sonner, Chutte fête dé Noué, lé matîn.

Et tous les anges, s'en vont chanter, Chutte fête dé Noué, chutte fête de Noué Et tous les anges, s'en vont chanter, Chutte fête dé Noué, lé matîn.

J'allons chanter, j'allons chanter, Chutte fête dé Noué, chutte fête de Noué, J'allons chanter, j'allons chanter, Chutte fête dé Noué, lé matîn.

Ouïy'-ous la chanson dé jouaie?

Ouïy'-ous la chanson dé jouaie?
"Christ est né, lé Rouai des Rouais!
Dans la paix, séyiz heutheurs!
Dgieu a saûvé les pécheurs!"
Lév'-ous, les nâtions d'la Tèrre,
Chantez auve tout l'Unnivèrs;
La natuthe a procliâmé:
"Lé Seigneu est né aniet!"
La natuthe a procliâmé:
"Lé Seigneu est né aniet!"

Christ, adouothé dans les cieux, Jésû Christ est not' Seigneu. Viyiz dans l'êtabl'ye bèrchi L'êfant dé la Vièrge Mathie! Adouothons à tout janmais Dgieu habilyi dans la chai Tch'appathaît coumme nous siez nous, Not' Emmanuel, not' Jésû! Tch'appathaît coumme nous siez nous, Not' Emmanuel, not' Jésû! Adouothons lé Prînce d'la Paix, Tch'apporte la Vie et la Jouaie, La Justice et la Santé: Not' Seigneu èrssuscité! Toute sa glouaithe il a laîssi; Nou n'étha pus peux d'mouothi; Il est né pouor nos êl'ver, Pouor qué j'séyons nés dèrché. Il est né pouor nos êl'ver, Pouor qué j'séyons nés dèrché.

Lé D'si des Nâtions est v'nu
Pouor nos offri san Salut.
Prend ta victouaithe, Fis d'Mathie,
Sus l'Dgiâbl'ye et san mauvaîtchi.
Fai-nous saver tan pouvé
En saûvant l'monde ruinné;
Tout s'sa rêunni aniet:
Té en nous et nous en té.
Tout s'sa rêunni aniet:
Té en nous et nous en té.

Pétite âne

Pétite âne, pétite âne,
Sus lé c'mîn pons'leux,
Continnue à marchi l'avant
Auve tan viage précieux;
Y'a bein longtemps qué tu piétounne
Dans la niet si g'lif,
N'perd pas couothage, car tu s'sas à
Bethléem tout d'suite.

Sounnez vos clioches chutte niet, Bethléem, Bethléem, Suiviz l'êtaile chutte niet, Bethléem, Bethléem; Pétite âne, pétite âne, Tchi fort jour pour té, Pétite âne, porte Marie Saufe sus san c'mîn. Pétite âne, pétite âne, Té v'là quâsi là, Né hésite pas pour un înstant, L'êtaile l'avant va; À eune êtabl'ye, ma p'tite âne, Ou s'n va t'dgider, Car dans chutte pliaiche s'en va naître Lé fis du Bouân Dgieu.

Sounnez vos clioches chutte niet, Bethléem, Bethléem, Suiviz l'êtaile chutte niet, Bethléem, Bethléem; Pétite âne, pétite âne, Tchi fort jour pour té, Pétite âne, porte Marie Saufe sus san c'mîn.

Habil'-ous don!

Anges ès étailes, brîngiz vos ailes! M'ttez vos robes d'or et d'argent! M'ttez vos charmes, et dans vot' armée v'nez en glorieux habilement!

Habil'-ous don! Attînt'-ous don! M'ttez vot' Dînmanche, faites d'vot' tchian! Laine, souaie, coton, ou chiquetaillons, chang'-ous pouor lé Saint êfant!

M'ttez vos corsets d'oeuvre! Vot' troupé restétha sus les côtis. D'valez là-bas; i' vos caûff'tha, dans sa glouaithe, gardeurs d'brébis!

Habil'-ous don! Attînt'-ous don! M'ttez vot' Dînmanche, faites d'vot' tchian! Laine, souaie, coton, ou chiquetaillons, chang'-ous pouor lé Saint êfant! M'ttez vos mantchieaux riches et rouoyaux!
Mâges, griy'-ous! Viagiz au Vouêt!
Bein dêliêment auve vos présents, souotre l'êtaile tchi mouontre la vouaie.

Habil'-ous don! Attînt'-ous don! M'ttez vot' Dînmanche, faites d'vot' tchian! Laine, souaie, coton, ou chiquetaillons, chang'-ous pouor lé Saint êfant!

Joseph, té v'là!
Tchil abrias!
Toutes tes hardes touoillies du c'mîn!
Bouôn tchèrpentchi,
tu'as bein viagi.
Y'étha d'pus belles robes à v'nîn.

Habil'-ous don! Attînt'-ous don! M'ttez vot' Dînmanche, faites d'vot' tchian! Laine, souaie, coton, ou chiquetaillons, chang'-ous pouor lé Saint êfant! Méthe dé Jésû, dans tan fro d'bliu, tendrément tu vil'ye sus li; tan fis fretté, acanté té chu p'tit êfant est l'Bouôn Dgi.

Habil'-ous don! Attînt'-ous don! M'ttez vot' Dînmanche, faites d'vot' tchian! Laine, souaie, coton, ou chiquetaillons, chang'-ous pouor lé Saint êfant!

Air: Cantique 113, Recueil de Cantiques Méthodiste, 1889



J'ouïs les belles clioches du Jour dé Noué

J'ouïs les belles clioches du Jour dé Noué sonner l'vièr chant du temps pâssé. Ches bouôns vièrs mots èrsonnent acouo: "Paix sus la tèrre, bonheu ès gens".

Et j'pensis coumme, à sinne dé jeu, touos les cliochièrs du monde d'achteu sonnent lus doux m'sage d'avaû les âges: "Paix sus la tèrre, bonheu ès gens".

Et l'tou du monde, n'y'a rein d'nouvé ichîn souos l'touannement du solé - chu vièr cantique janmais n'èrsique: "Paix sus la tèrre, bonheu ès gens".

Mais au m'sespé, j'fis un soupi.
"Sus la tèrre n'y'a pon d'paix," qué j'dis.
"Lé ma pitchit au pilôsi
'Paix sus la tèrre, bonheu ès gens'".

Épis les clioches sonnîdrent pus hautes: "Dgieu n'est pon mort, nitout I' n'haûte. L'Malîn pèrdra; lé Bouôn l'saitha: 'Paix sus la tèrre, bonheu ès gens'".

Jésû Christ lé bieau pommyi

Mén âme a veu lé bouais d'la vie tch'est tréjous vèrt et chèrgi d'frit. Mén âme a veu lé bouais d'la vie tch'est tréjous vèrt et chèrgi d'frit. Ch'est l'pus bel arb' dans la bouaîs'sie, tch'est Jésû Christ lé bieau pommyi.

J'n'ai janmais veu dé tchi si bé. Dans man tchoeu la fouai est pliantée. J'n'ai janmais veu dé tchi si bé. Dans man tchoeu la fouai est pliantée. Et j'vai achteu la glouaithe tchi lit dans Jésû Christ lé bieau pommyi.

J'ai couothu souotre lé fanne et l'ji, et man bein, j'l'ai tout gâzouoilli. J'ai couothu souotre lé fanne et l'ji, et man bein, j'l'ai tout gâzouoilli. Mais j'ai r'trouvé tout man pliaîsi en Jésû Christ lé bieau pommyi.

Quand j'sis lâssé par man travas, à l'ombre ichîn j'trouve un assias. Quand j'sis lâssé par man travas, à l'ombre ichîn j'trouve un assias. Paîsibliément jé s'sai assis souos Jésû Christ lé bieau pommyi.

Chu frit a un goût d'èrva-s-y tchi m'ravigote sus man mouothi. Chu frit a un goût d'èrva-s-y tchi m'ravigote sus man mouothi. Pouor tréjous m'n âme s'sa à l'abri auve Jésû Christ lé bieau pommyi.

Saûticotons à Béthléhem

Les angnieaux quénotent sus les côtis, lus gardeurs happent la pathe d'un ambron. Oh! Dgéthotons acanté les brébis; couothons étout ava ches monts!

Béthléhem, Béthléhem! Saûticotons tous à Béthléhem! Béthléhem, Béthléhem! Saûticotons tous à Béthléhem!

Les chanmeaux chabolent par lé sablion; i' gabathent douochement par sus les mielles; coumme les Trais Mages cachent ava et amont; là-haut dans l'ciel ou pâsse, l'êtaile!

Béthléhem, Béthléhem! Saûticotons tous à Béthléhem! Béthléhem, Béthléhem! Saûticotons tous à Béthléhem! À doubl'yé rang i' marchent, les Romains; les soudards sièvent la c'mande du chent'nyi pouor lus appréchi d'la ville bein d'amain, gângni lus lyits et lus couochi!

Béthléhem, Béthléhem! Saûticotons tous à Béthléhem! Béthléhem, Béthléhem! Saûticotons tous à Béthléhem!

L'âne et l'boeu, ieux, i' piétinnent étout dans l'êtabl'ye où'est qu'l'êfant est bèrchi; tandi qu'un tchoeu d'anges dgêpe tout à l'entou Louangeant l'êfant tchi r'mue ses pids!

Béthléhem, Béthléhem! Saûticotons tous à Béthléhem! Béthléhem, Béthléhem! Saûticotons tous à Béthléhem!

Air: Cantique 192, Recueil de Cantiques Méthodiste, 1889



Ch'est la Sèrvelle dé Noué!

Lé Bouôn Dgieu griyit l'vièr Âdam, au c'menchement, du ponsi. I' l'înspithit en soûffliant d'dans auve lé soûffl'ye dé la vie. Et lé Seigneu fit pouor ch't houmme-chîn eune d'meuthe au Paradis, pouor souongni les flieurs d'san gardîn, en êt' lé gardîngni.

Chantez des louanges à not' Saûveux d'pis l'êfant nos fut né. Rêjouiss'-ous don! Séyiz heutheurs! Ch'est la Sèrvelle dé Noué!

Et Êve et Âdam y d'meuthaient et s'mîndrent à travailli. À seule fîn d'les garder en paix, ainchîn l'Bouôn Dgieu lus dit: "Mangiz-en tout excepté l'frit tchi craît sus chu grand bouais. Lé chein tch'en mange s'en va mouothi, condamné à janmais."

Chantez des louanges à not' Saûveux d'pis l'êfant nos fut né. Rêjouiss'-ous don! Séyiz heutheurs! Ch'est la Sèrvelle dé Noué! Lé Bouôn Dgieu aime l'humannité. Né v'là l'mithacl'ye qu'i' fit: ès d'cendants d'Âdam êdgéthés, i' mouontrit san pitchi. À seule fîn dé nos racater dé chu Malîn Esprit, et pouor l'amour dé nos saûver, i' nos env'yit san Fis.

Chantez des louanges à not' Saûveux d'pis l'êfant nos fut né. Rêjouiss'-ous don! Séyiz heutheurs! Ch'est la Sèrvelle dé Noué!

Et achteu ch'est la sainte saîson dans tchi not' Saûveux vînt. Séyons heutheurs, et fricotons auve des gâches et podîns. Pliaingnons les pouôrres et affanmés, baillons-lus à mangi, et si j'l'avons bein méthité, j'veindrons au Paradis.

Chantez des louanges à not' Saûveux d'pis l'êfant nos fut né. Rêjouiss'-ous don! Séyiz heutheurs! Ch'est la Sèrvelle dé Noué!

Papa Nové s'en veint en Jèrri

Oh, mousses, comport'-ous! I' n'faut pon piailli, nitout faithe la moue, j'vos dithai pouortchi:

Papa Noué s'en veint en Jèrri!

I' graie sa p'tite liste, l'èrliêthant deux fais, pouor pouver sparti l'bouôn d'auve lé mêché.

Papa Noué s'en veint en Jèrri!

I' t'vait quand tu'es à dormi et quand tu'es rêvilyi. I' sait si tu'as 'té bein poli ou à graie d'la dgiâbliéthie!

Oh, mousses, comport'-ous! I' n'faut pon piailli, nitout faithe la moue, et j'dithai pouortchi:

Papa Noué s'en veint en Jèrri!

Auve frits et codrettes et tout un amas dé gofiches et jouettes tchi font un camas.

Papa Noué s'en veint en Jèrri!

Les mousses veulent qu'i' mette tout drait dans sa pouque toutes sortes dé poupettes et des ours en pliuque.

Papa Noué s'en veint en Jèrri!

Et les pathents à r'garder les mousses à jopînter, les fil'yes et garçons à jouarder tout l'tou dé l'arb' dé Noué.

Oh, j'dithai pouortchi: les êfants, mêfi'-ous! I' n'faut pon piailli, nitout faithe la moue:

Papa Noué s'en veint Papa Noué s'en veint Papa Noué s'en veint siez nous!

Couochi dans eune êtabl'ye

Couochi dans eune êtabl'ye, sans bèr et sans liet, lé p'tit Seigneu Jésû est là à haûter; les êtailes êcliaithies seurvil'yent lé saint p'tchiot, lé p'tit Seigneu Jésû à dormi dans l'tro.

Les vaques sont à bueûler - i' r'est rêvilyi; mais chu bouôn p'tit Jésû n'est pon pouor piailli. J't'aime bein, Seigneu Jésû: seurvil'ye-mé des cieux et reste auprès d'man bèr jusqu'à sinne dé jeu.

Vé-t-en, Seigneu Jésû, reste acanté mé; sai tréjous à m'dgetter, tréjous à m'aimer. Aime touos les p'tits êfants qu'nou-s'est à bèrchi, et reste auprès d'nos lyits jusqu'au drein soupi.

Les bein bouonnes bêtes

Jésû, not' Saûveux, l'Jour dé Noué, dans eune vielle êtabl'ye i' fut né auve les bein bouonnes bêtes à l'èrgarder: Jésû, not' Saûveux, l'Jour dé Noué.

Mé, dit l'ânon ès longues ouothelles, j'portis sa méthe, Mathie la belle souos l'caud solé epis l's êtailes, mé, dit l'ânon ès longues ouothelles.

Mé, dit la vaque couleu dé myi, j'lî baillis man tro pouor lé couochi épis man fain pouor s'n ouothilyi, mé, dit la vaque couleu dé myi.

Mé, dit la brébis ès cônes corlées, j'lî baillis d'ma laine pouor san blianket, d'la laine pouor l'enfliuber au liet, mé, dit la brébis ès cônes corlées. Mé, dit la colombe, blianche coumme la né, j'fis coucouroux pouor lé bèrchoter, j'fînmes coucouroux, ma douoche et mé, mé, dit la colombe, blianche coumme la né.

Les bein bouonnes bêtes, bénites et belles, racontent châtcheune sén alibèle: coumme dans l'êtabl'ye si néthe et vielle, il' atchilyîtent Emmanuel.

Jésû, not' Saûveux, i' fut né dans eune êtabl'ye lé Jour dé Noué, auve les bein bouonnes bêtes à l'entouother: Jésû, not' Saûveux, i' fut né.

Drélindgettes

Les rues pavées, des rues à vaie pouor la Fête habilyies: à banon y'a un esprit d'un Bouan Noué.

Les mousses à rithe, les gens arrivent auve les tchoeurs bein rêjouis; à la carre dé châque quémîn nou ouait:

Drélîndgettes et cliochettes: la Fête dé Noué à Saint Hélyi. Clioches d'argent, tchîncaillant: bétôt ché s'sa l'Jour dé Noué. Des veues d'affi, les veues d'trafi blyîntchant rouoge, or, et vèrt coumme lé monde rentre siez sé auve ses trésors.

I' tchait d'la né pouor Papa Noué et pouor touos nos avièrs et par-d'ssus tout chu camas nou ouait:

Drélîndgettes et cliochettes: la Fête dé Noué à Saint Hélyi. Clioches d'argent, tchîncaillant: bétôt ché s'sa l'Jour dé Noué.

Tout chein qué j'veurs chu Noué est té

Jé n'veurs pon un tas pouor man Noué; y'a raîque eune chose à d'sither. Pouor dé mé ch'n'est pon les présents arreunés souos l'arb' dé Noué. J'veurs raîque té à tan tout seu, raîque té pouor rêjoui man tchoeu. V'là tch'est tout m'n espé; tout chein qué j'veurs chu Noué est té.

Jé n'veurs pon un tas pouor man Noué; y'a raîque eune chose à d'sither. Pouor dé mé ch'n'est pon les présents arreunés souos l'arb' dé Noué. J'n'ai pon à croch'ter ma cauche là là-haut sus l'ais d'ma cheunm'née; Papa Noué né f'tha pon d'pliaîsi auve eune jouette lé Jour dé Noué; j'veurs raîque té à tan tout seu, raîque té pouor rêjoui man tchoeu. V'là tch'est tout m'n espé. Tout chein qué j'veurs chu Noué est té, Man tchoeu (Ma douoche)

Jé n'veurs pon un tas pouor man Noué; ch'n'est pon d'la né tch'est man d'si; j'm'en vais rester assis au dget pouor êt' embraichi(e) souos l'dgi; jé n'f'thai pon eune liste pouor env'yer liain au Nord siez Papa Noué; j'n'm'en vais pon rester à vilyi pouor ses chèrs enchorchélés. Ch'est raîque té qué j'veurs à ces sé, té ichîn acanté mé. Tchi d'aut' ajouôter? Tout chein qué j'veurs chu Noué est té, té.

Toutes les veues sont satchies et tout est êcliaithi.
Ouïy'-ous les brais et ris des mousses bein rêjouis?
Épis tout l'monde à chanter et toutes les clioches à sonner.
Papa Noué, apporte tout chein tch'i' m'faut pouor Noué, apporte s'i' t'pliaît man tchoeu (ma douoche) siez mé.

Jé n'veurs pon un tas pouor man Noué; j'en éthai don tant et pus à vaie man tchoeu (ma douoche) l'avant à mé, mâté(e) sus lé pas dé m'n us. J'veurs raîque té à tan tout seu, raîque té pouor rêjoui man tchoeu. V'là tch'est tout m'n espé. Tout chein qué j'veurs chu Noué est té, té.

Tout chein qué j'veurs chu Noué est té. Tout chein qué j'veurs chu Noué est té.

Aussi bein qu'les Trais Rouais

Quand Jésû 'tait un pétchiot et né d'la Vièrge Mathie, les preunmièrs tchi lé louangîtent lî vîntent d'eune bèrgéthie. Et lé-é chein tch'a des ouothelles pouor ouï, véthe-dgia, qu'i' ouaie: Jésû aimait les bèrgers aussi bein qu'les Trais Rouais.

Quand Jésû 'tait tchèrpentchi, atout clious et martchieaux il apprannait san mêtchi coumme les aut's sîmpl'yes hardgieaux. I' chi-innait à tigue dé corps sus bein dé buts dé bouais. Jésû aimait san travas aussi bein qu'les Trais Rouais.

Quand Jésû fut trisonné et env'yé à sa mort, né v'là tchi soûffraient auve li deux voleurs, des deux bords. Même su-us chu Mont à la Cranne et clioué sus la crouaix, ch'est qu'Jésû aimait l'voleux aussi bein qu'les Trais Rouais.

Quand Jésû, ressuscité, montit ès pus hauts lieux, i' s'assiévit pouor jugi là, au dêtre du Bouôn Dgieu. Quand j'tchi-itt'tai chutte vie d'mînséthe, jé s'sai heutheux, car j'crai qué Jésû aime lé pécheux aussi bein qu'les Trais Rouais.



Nos v'chîn dans la ville d'Dâvi

Nos v'chîn dans la ville d'Dâvi; j'montons amont ses c'mîns.
Mais où'est qu'j'allons nos couochi pouor l'êfant tch'est à v'nîn?
Louangeons don not' Bouôn Seigneu tchi nos mouontrit lé c'mîn tchi nos a m'né à chu lieu dans la vielle ville, nos v'chîn.

Coumme tchi trouver eune aubèrge? Coumme tchi trouver un liet y couochi eune méthe tch'est Vièrge et l'êfant tchi s'sa né? Prions tréjous au Bouôn Dgieu tchi dgide drait ses pèl'rîns. Si ch'est qu'l'êfant veint achteu, jé trouv'thons d'l'aîgue ichîn.

Mais toutes lus portes sont bârrées, et freunmés touos lus us.
Les gens voudraient nos cârrer: à toutes les carres - l'èrfus.
Mais l'âne et l'boeu sont louogis dans la carre dé l'êtabl'ye; y'étha du r'pos et du ji dans eune stâlle confortabl'ye.

Couoche-té, bouonnefemme, sus la pâlle: not' viage est à sa fîn.
Auve lé bestchias dé la stâlle, jé sommes siez d'bouôns anmîns.
Ouai-tu, bouonhoumme, la chant'tie des anges ès pus hauts lieux: un lô-lô à l'êfant tchi s'sa dé touos lé Saûveux?



Nous voici dans la ville

L'Éfant à Béthléhém

Chutte fête dé Noué j'allons mèrtchi auve tchoeu et bouoche et yi en mémouaithe dé not' Jésû Chri: l'êfant à Béthléhém

Driéthe i' laîssit l'Paradis et siez nous i' d'valit, né pouor nous dé la Vièrge Mathie: l'êfant à Béthléhém

Épis les anges chantîtent ès cieux et vîntent nos dithe qu'achteu pouor nous i' fut né, not' Saûveux: l'êfant à Béthléhém

Tchi grand amour, tchi sîngne dé paix qué l'Angné nos fit vaie, quand Jésû géthit dans la chai: l'êfant à Béthléhém

Glouaithe à Dgieu dans les pus hauts lieux tchi règne atout bonheu; J'viyons san d'si divîn achteu: l'êfant à Béthléhém



Viyiz, blianc dans les bonds d'né

Viyiz, blianc dans les bonds d'né, l'Angné tchi pouor nous fut né. Viyiz l'chein tch'est doux et bouan, promîns d'pis les touos vièrs temps.

Hèque lé Saûveux tch'a 'té né! Hèque la sinne dé jeu dé Noué! Chantez à Jérusalem! Hèque lé p'tchiot à Béthléhém!

Dans la néthe êtabl'ye, couochi est l'chein tchi fit tout ch'tchi lit, li tchi 'tait couronné d'lueu auve les anges ès pus hauts lieux.

Né v'chîn des bèrgers tchi veinnent en jouaie, ayant ouï les dreines: Anges et bèrgers et brébis rêjouis d'la naîssance du Fis.

D'vièrs mînniet sus les côtis, la nièrcheu fut êcliaithie: un tchoeu d'anges tchi chantaient "Paix!" les bèrgers sont v'nus lé vaie.

Saint p'tit êfant, Fis dé Dgieu, Angné êgaluant d'bliancheu, né dans la né dé l'Hivé pouor nos saûver du péché.

Hèque Saint Nicolas!

Au fîn tchoeu dé l'hivé, tchi qu'il est tchi pâsse et offre à châque avé eune poutchie dé grâce? Viy'-ous l'manté lithant, robes dé rouoge et vèrt? Dans sa pouque, des présents pouor touos les p'tits avièrs. Tchi qu'est ch't engibâtré? Li, tchi n'fait pon d'ma? Rouoge et vèrt l'travèrs d'la né... Hèque Saint Nicolas!

La sonn'nie du cliochi pouor les prisonnièrs; v'là Nico tchi geuthit dans san rouoge et vèrt.
Lé pendard fut bliotchi.
Lé saint prêchit, "Paix à touos ches pouôrres blioutchis!"
Les clioches sonnîtent en jouaie.
Tchi qu'est ch't engibâtré?
Li, tchi n'fait pon d'ma?
Rouoge et vèrt l'travèrs d'la né...
Hèque Saint Nicolas!

Bouonne cache! Nic'lesse viagit au liain en baté; la tempête à m'nichi, Nico à prier.
Tout l'tou la mé rud'dgit, les louêmes fortes et folles. Nic'lesse mînt tout au lis atout ses saintes patholes.
Tchi qu'est ch't engibâtré?
Li, tchi n'fait pon d'ma?
Rouoge et vèrt l'travèrs d'la né...
Hèque Saint Nicolas!

Dans eune aubèrge couochi,
Nic'lesse dêmuchit
les victînmes d'un bouochi toute eune bathilyie.
Né v'là l's èrssuscités,
châque pétchiot entchi.
Èrmèrcions l'chein tch'a r'grée
d's êfants d'sêtchilbouêtchis.
Tchi qu'est ch't engibâtré?
Li, tchi n'fait pon d'ma?
Rouoge et vèrt l'travèrs d'la né...
Hèque Saint Nicolas!

Trais hardelles en pouôrreté, par lé d'so d'lus péthe; à êt' mînses sus l'pavé, pèrdues en mînséthe.
Nico prînt sa poutchie; lus vèrsit des louis.
Il avait tout changi.
Chang'-ous acanté li!
Tchi qu'est ch't engibâtré?
Li, tchi n'fait pon d'ma?
Rouoge et vèrt l'travèrs d'la né...
Hèque Saint Nicolas!

Air: Cantique 63, Recueil de Cantiques Méthodiste, 1889



Clyînclias! Clyînclias! Clyînclias!

Clyînclias! Clyînclias! Clyînclias! Les bouonnes clioches sonnent ichîn bas! Clyînclias! Clyînclias! Des tchoeurs d'anges ès vouaix d'méta!

Les clioches ont annonchi qué not' Saûveux est né souos eune êtaile tchi lit. Êcoutons les clioches dé Noué:

Clyînclias! Clyînclias! Clyînclias! Les bouonnes clioches sonnent ichîn bas! Clyînclias! Clyînclias! Des tchoeurs d'anges ès vouaix d'méta!

Jésû est dans san bèr; des cliochettes à l'bèrchi. Lé camas des cliochièrs tressonne pouor nos rêvilyi:

Clyînclias! Clyînclias! Clyînclias! Les bouonnes clioches sonnent ichîn bas! Clyînclias! Clyînclias! Des tchoeurs d'anges ès vouaix d'méta! Ès bouôns gardeurs d'brébis, à l'angné dans lus bras, auve un amas d'sonn'nie les anges chantent lus hôsanna:

Clyînclias! Clyînclias! Clyînclias! Les bouonnes clioches sonnent ichîn bas! Clyînclias! Clyînclias! Des tchoeurs d'anges ès vouaix d'méta!

Les clioches sonnent auve d'la jouaie et font rêjoui les cieux, l'êtaile et les Trais Rouais, les chanmeaux, et l'âne et l'boeu.

Clyînclias! Clyînclias! Clyînclias! Les bouonnes clioches sonnent ichîn bas! Clyînclias! Clyînclias! Des tchoeurs d'anges ès vouaix d'méta!

Y'étha du cârillon d'ilo ès pus hauts lieux. Nou-s'en ouait lé tresson des grandes clioches tchi r'sonnent achteu: Clyînclias! Clyînclias! Clyînclias! Les bouonnes clioches sonnent ichîn bas! Clyînclias! Clyînclias! Des tchoeurs d'anges ès vouaix d'méta!

Ch'est eune journée dé ji j'ouïyons cârillonner partout lé monde entchi les cliochettes du jour dé Noué:

Clyînclias! Clyînclias! Clyînclias! Les bouonnes clioches sonnent ichîn bas! Clyînclias! Clyînclias! Des tchoeurs d'anges ès vouaix d'méta!

Clyînclias! Clyînclias! Clyînclias! Tchoeurs d'anges ès vouaix d'méta! Clyînclias! Clyînclias! Clyînclias! Les bouonnes clioches sonnent ichîn bas!



Vé-t-en, bouoillon dé toute bouônté

Vé-t-en, bouoillon dé toute bouônté, arrouôse man tchoeu d'l'ieau d'la vie, d'valant sus mé sans s'accompter; ch'est d's'y bangni et d'louangi.
Mène-mé dans un chant dé douocheu auve des langues à fliambes ès cieux.
Qué l'mont sait louangi! Dans man tchoeu, j'monte au grand amour dé Dgieu.

J'bâtithai mén Ebenhézèr ichîn ioù qu'j'sis v'nu auve té; auve té, jé m'dêhal'lai des d'sèrts, j'veindrai en seûth'té siez mé. Jésû m'traichit, un êtrangi êdgéthé liain d'san troupé. I' m'a saûvé dé tout dangi auve san précieux sang vèrsé.

Sa grâce est si mangnifique et tréjous j'ai à l'èrpayi.
Qu'sa grâce m'enhalaûde et m'fique et m'lier à man gardeux d'brébis.
À touos buts d'camp, j'abandonne tout au Bouôn Dgieu et à la mé; garde man tchoeu, Seigneu, à tréjous pouor lé ciel qu'i' sait scêllé.

Mînniet, Chrêtchiens

Mînniet, Chrêtchiens, né v'là l'heuthe sainte tch'a sonné. Des pus hauts lieux Dgieu d'valit dans la chai, pouor asseûther la grâce tchi nos fut donnée et dé d'dans l'êtabl'ye r'êtablyi la paix. Ch'est pouor chenna qu'lé monde entchi espéthit pouor chutte belle niet tchi nos donne un Saûveux. Agenouoill'-ous touos! La niet vos est êcliaithie! Oh niet dé Noué! Né v'chîn not' Rédempteux! Oh niet dé Noué! Né v'chîn not' Rédempteux!

Qué not' fouai saque eune veue trélûthante tch'îthait nos dgider auprès du p'tchiot dans san bèr, coumme au temps pâssé eune êtaile tchi lithait y m'nit les grands mages lé travèrs du d'sèrt. Chu rouai des rouais est couochi dans un pouôrre tro; Piêssants d'achteu si fièrs dans vot' grandeu, à vot' vandgîthe lé Bouôn Dgieu vos prêche d'ilo: Cârr'-ous! Cârr'-ous l'avant au Rédempteux! Cârr'-ous! Cârr'-ous l'avant au Rédempteux!

Lé Rédempteux a d'senhalaûdé les bas: la Tèrre est libre et l'Ciel nos est ouvèrt. I' vait un fréthe où'est qu'y'avait raîque un vassa. L'amour unnit l's enn'mîns et l's êtrangièrs. Tchi qui s'en va l'èrmèrcier à hauteu d'vouaix? Ch'est en tchi il a 'té né dans not' tchoeu. Mât'-ous, bouonnes gens! Chantez-li à tout janmais! Oh niet dé Noué! Louangeons not' Rédempteux!

Jésû est né!

Jésû est né! qu'nou dit ès gardeurs d'brébis. Lé jour dé Noué, nou chante sus les côtis: Jésû est né! Lé jour dé Noué! Jésû est né! Lé jour dé Noué!

Chantons achteu pouor châque pétchiot et angné
"Glouaithe ès hauts lieux!" pouor chu saint jouéyauté
Chantons achteu
"Glouaithe ès hauts lieux"!
Chantons achteu
"Glouaithe ès hauts lieux"!

Paix sus la tèrre à touos les bords et tréjous, En mé, en l'air, ilo et d'en par iou. Paix sus la tèrre, en mé, en l'air! Paix sus la tèrre, en mé, en l'air! Dé d'dans lé d'sèrt, les Mages ont siévi l'êtaile Drait à san bèr, au p'tit Emmannuel. Dé d'dans lé d'sèrt drait à san bèr! Dé d'dans lé d'sèrt drait à san bèr!

Chantons nos louanges auve la myrrhe, l'enchens et l'or, Auve un tchoeu d'anges au d'ssus du mousse tchi dort. Chantons nos louanges auve un tchoeu d'anges! Chantons nos louanges auve un tchoeu d'anges!

Lé jour dé Noué, siéviz l'êtaile tchi pétil'ye! Jésû est né! Qué tout l'monde veinge en ville! Lé jour dé Noué! Jésû est né! Lé jour dé Noué! Jésû est né!

Air: Cantique 71, Recueil de Cantiques Méthodiste, 1889



Rêvil'-ous touos!

Rêvil'-ous touos! J'tapons à vot' us! Séyiz heutheurs! Jésû est né! Né dormiz d'aut'! Atchilyiz Jésû! Dêhal'-ous et sautez du liet!

Les cheins tchi marchaient dans la nièrcheu, qu'lé prophète dit, ont veu eune grande lueu. Et v'là tchi lit! Ch'est Jésû - not' Saûveux, not' crâsset et not' sinne dé jeu!

Rêvil'-ous touos! M'ttez vot' bouôn Dînmanche! Séyiz heutheurs! Jésû est né! Les nâtions sont bénies dans la s'menche d'Àbréhan, coumme ch'fut procliâmé!

Les cheins tchi marchaient dans la nièrcheu, qu'lé prophète dit, ont veu eune grande lueu. Et v'là tchi lit! Ch'est Jésû - not' Saûveux, not' crâsset et not' sinne dé jeu!

Rêvil'-ous touos! D'valez dans la rue! Séyiz heutheurs! Jésû est né! N'ayiz pon d'peux! Lé ma est vaintchu et touos nos péchés, racatés.

Les cheins tchi marchaient dans la nièrcheu, qu'lé prophète dit, ont veu eune grande lueu. Et v'là tchi lit! Ch'est Jésû - not' Saûveux, not' crâsset et not' sinne dé jeu!



Eune hardi bouonne bordée d'Noué

j'sommes à vilyi et à ces sé j'éthons du ji v'là tch'est assez

raîque pouor aver eune hardi bouonne bordée d'Noué raîque pouor aver eune hardi bouonne bordée d'Noué

tchi bouonne bordée tchi rêvillon qu'nou connaît raîque à chutte saîson

raîque pouor aver eune hardi bouonne bordée d'Noué raîque pouor aver eune hardi bouonne bordée d'Noué

la dgaîngue dé mousses chantent lus cantique clyînclias, clyînclias clyînclias, clyînclias clyînclias, clyînclias ah!

raîque pouor aver eune hardi bouonne bordée d'Noué raîque pouor aver eune hardi bouonne bordée d'Noué

à chein qu'nou dit dans l'vaîthinné ch'est dé trîntchi à la santé

raîque pouor aver eune hardi bouonne bordée d'Noué raîque pouor aver eune hardi bouonne bordée d'Noué

la dgaîngue dé mousses chantent lus cantique auprès douze mais d'pratique clyînclias, clyînclias clyînclias, clyînclias clyînclias, clyînclias

tchi bouonne bordée et à ces sé j'éthons du ji v'là tch'est assez

raîque pouor aver eune hardi bouonne bordée d'Noué raîque pouor aver eune hardi bouonne bordée d'Noué

j'sommes à vilyi et à ces sé j'éthons du ji v'là tch'est assez

raîque pouor aver eune hardi bouonne bordée d'Noué ah bordée d'Noué

Né v'chîn les papillons dé né

Viyiz l'saint nouvieau-né dans un bèr si p'tit, enfliubé en Hivé, dans l'corps et l'esprit; Par d'ssus l'êfant dans san bèr v'là tchi fliotte et danse en l'air, tout pathaît si cliai et bé - né v'chîn les papillons dé né.

La ville est à haûter souos un blianc lîncheu, Coumme tchi en dêpieauter du péché d'achteu? V'là tchi veint nos rêvilyi, ch'est not' Saûveux, Jésû Chri. Né v'chîn sa nativité - né v'chîn les papillons dé né.

La campangne est haitchie, espéthant chutte jouaie.
Lé péché est gliaichi souos la né tchi tchait.
Par les clios et les côtis v'là tchi s'lanche à voltilyi.
Ch'est d'nos rêjoui à ces sé - né v'chîn les papillons dé né.

Tout chu monde est bèrchi abouon toute la niet. La gliaiche es'sa pèrchie par not' neu solé; i' nos r'caûff'tha auve sa chai; né v'chîn l'pliaîsi et la paix. Cache, la mînséthe et l'péché! Né v'chîn les papillons dé né.

Air: Cantique 35, Recueil de Cantiques Méthodiste, 1889



Quand un p'tchiot est né

Eune lueu d'espé trélûthe dans lé ciel, et bein à haut y'a eune p'tite êtaile, et partout ou s'lève, chutte neuve matinnée: chennechîn s'adonne quand un p'tchiot est né.

Un souhait sans vouaix vaile ès ochéans. et dans les bouais nou ouait l'changement d'vent; les muthâles du d'so lus sont êcrouôlées: chennechîn s'adonne quand un p'tchiot est né.

Eune rôsée tchait tch'est tout d'couleu d'rose; nou c'menche à craithe êt' sauf pouor eune pause. Et achteu tout l'monde en sembl'yent rasseûthés: chennechîn s'adonne quand un p'tchiot est né.

Et tout chennechîn s'adonne viyant qu'lé monde sont à espéther, espéther un p'tchiot - nièr, blianc, jaune, n'y'a fis d'âme tchi l'sait... mais un p'tchiot tchi s'en va grandi et touônner les lèrmes en ris, la haine en amour, la dgèrre en paix et châtchun à san vaîthîn, et la mînséthe et la souffranche s'sont des mots à oublier à tout janmais.

Ch'est raîque un rêve, nou-s'en est dêfait, mais tôt ou tard tout chenna s'sa vrai; et partout ou s'lève, chutte neuve matinnée: chennechîn s'adonne quand un p'tchiot est né.

J'îthons chantant à Béthléhem

J'îthons chantant à Béthléhem: tra-la-la-la-la-la-la! P'tit Jésû, p'tit Saûveux j'm'en vais chanter épis t'bèrchi. P'tit Jésû, p'tit Saûveux j'm'en vais chanter à tan bèr.

Joue Dgémîn! Prans ta pouque à vent: houinne et houinne et houinne et ouah! P'tit Jésû, p'tit Saûveux J'm'en vais chanter épis t'bèrchi P'tit Jésû, p'tit Saûveux J'm'en vais chanter à tan bèr

Jeannot, fai tan pipelot piper: pipe et pipe et pipe au pas!
P'tit Jésû, p'tit Saûveux
j'm'en vais chanter épis t'bèrchi.
P'tit Jésû, p'tit Saûveux
j'm'en vais chanter à tan bèr.

Et té, Nico, vîngnonne acouo: vîngnonne, vîngnonne, vîngnonne, va! P'tit Jésû, p'tit Saûveux j'm'en vais chanter épis t'bèrchi. P'tit Jésû, p'tit Saûveux j'm'en vais chanter à tan bèr.

Et Louothains, fai la bâsse bueûler: bueûle et bueûle et bueûle et bueûle et bas!
P'tit Jésû, p'tit Saûveux
j'm'en vais chanter épis t'bèrchi.
P'tit Jésû, p'tit Saûveux
j'm'en vais chanter à tan bèr.

Ouïy'-ous, ouïy'-ous, gardeurs d'brébis?

Ouïy'-ous, ouïy'-ous, gardeurs d'brébis, dans la niet chutte nouvelle chant'tie d'un cantique céleste et doux à Béthléhem et tout l'tou?

Ch'est d's anges tch'ont geuthi à ces sé, lus m'sage dé glouaithe à procliâmer; lé p'tit mousse n'en ouïtha rein couochi douochement dans l'êtrain.

Chu p'tit êfant est l'fis dé Dgieu, tch'est v'nu sus la tèrre coumme un dgeux; couochi sans couronne ni glouaithe, lé p'tchiot d'eune humbl'ye et pouôrre méthe.

Né v'chîn i' viagent dé l'Êst au Vouêt, trais avisés, trais piêssants rouais, pouor offri louanges et honneurs au p'tit Seigneu des seigneurs.

Et j'veindrons iou qu'il est couochi; ch't' êtabl'ye èrsembl'ye au paradis où'est qu'les anges procliâment ès cieux qu'ichîn d'meuthe lé fis dé Dgieu.

Lé Cantique du Coucou

Lé coucou volit hors d'la bouaîs'sie Coucou! jusqu'au bèr où'est qu'l'êfant 'tait pliaichi Coucou! chantant san cantique dé bonheu lé coucou loûsit san Seigneu: Coucou, coucou, coucou!

La colombe jutchie là-haut sus l'faît Ronron! s'êcantit dêliêment à ronner Ronron! Oulle avait tant d'ordgi et d'jouaie d'saver qu'lé p'tit Jésû 'tait né: Ronron, ronron!

La teurtéthelle à l'êtabl'ye volit Coucouroue! au bèr à Jésû pouor l'atchilyi Coucouroue! du fond d'sa fale, du fond d'san tchoeu ou chantit au p'tchiot tch'est l'Saûveux: Coucouroue, coucouroue!

Par les chénolles crève-tchoeu

Par les chénolles, par les chénolles crève-tchoeu, par les chénolles, par les chénolles crève-tchoeu tchi qu'y marchit? tchi qu'y marchit? La méthe dé not' Seigneu. Tchi qu'y marchit? tchi qu'y marchit? La méthe dé not' Seigneu.

Ou rencontrit là la sainte Lîzabé, ou rencontrit là la sainte Lîzabé "Ioù qu'tu vais, té, ioù qu'tu vais, té, ma couôsinne, à ces sé? Ioù qu'tu vais, té, ioù qu'tu vais, té, ma couôsinne, à ces sé?"

"J'm'en vais, couôsinne, j'm'en vais à la chapelle, j'm'en vais, couôsinne, j'm'en vais à la chapelle, ouï les vêpres là, ouï les vêpres là; où'est qu'la chant'tie est belle; ouï les vêpres là, ouï les vêpres là; où'est qu'la chant'tie est belle."

"Nou-fait, couôsinne, n'va pon à la chant'tie! Nou-fait, couôsinne, n'va pon à la chant'tie! J'm'en vais té dithe, j'm'en vais té dithe, qué tu'éthas un p'tit fis. J'm'en vais té dithe, qué tu'éthas un p'tit fis.

Tu l'éthas quand l'monde en s'sont touos rêjouis. Tu l'éthas quand l'monde en s'sont touos rêjouis. Mais i' gèle dû, mais i' gèle dû, touos les fontaines et pits.

Mais i' gèle dû, mais i' gèle dû, touos les fontaines et pits.

Tchi qui créthait en ouïyant chutte nouvelle, tchi qui créthait en ouïyant chutte nouvelle qu'y'étha un fis, qu'y'étha un fis, né d'eune vièrge, d'eune hardelle? Qu'y'étha un fis, qu'y'étha un fis, né d'eune vièrge, d'eune hardelle?

Duthant les fêtes, duthant les fêtes dé Noué, duthant les fêtes, duthant les fêtes dé Noué quand les fontaines, quand les fontaines et les pits sont touos g'lés, quand les fontaines, quand les fontaines et les pits sont touos g'lés."

N'y'a pon d'ouaîsé, ni mouosson ni raîté, n'y'a pon d'ouaîsé, ni mouosson ni raîté; raîque la néthe fraid, raîque la néthe fraid, raîque eune touothâle dé né, raîque la néthe fraid, raîque la néthe fraid, raîque eune touothâle dé né.

Y'a eune seule ieau tchi n'avait pon tout g'lé, y'a eune seule ieau tchi n'avait pon tout g'lé, où'est qu'la Mathie, où'est qu'la Mathie s'en fut qu'si eune bouqu'tée pouor san Jésû, pouor san Jésû pouor douochement lé laver.

Lô-lô achteu p'tit Jésû

Lô-lô achteu p'tit Jésû, p'tit Jésû, j'té m'ttons un bieau blianket d'ssus; j'nos'n'allons douochement t'bèrchi pouor qu'tu piêsse en paix dormi. Lô-lô achteu p'tit Jésû j'té m'ttons un bieau blianket d'ssus.

Lô-lô achteu chièr pétit, chièr pétit, p'tit êfant dé Sainte Mathie; j'nos'n'allons douochement t'bèrchi pouor qu'tu piêsse en paix dormi. Lô-lô achteu chièr pétit, p'tit êfant dé Sainte Mathie.

Au bèr du saint êfant

Lé monde afflioquent à Béthléhém; l'aubèrge est plieine à Béthléhém; j'n'éthons pon d'liet à Béthléhém; pouor couochi l'saint êfant.

Mais y'a du run là dans l'êtabl'ye, auve lé boeu et l'âne dans l'êtabl'ye ichîn j'éthons caud dans l'êtabl'ye j'y couoch'chons l'saint êfant.

Des troupieaux d'brébis ès côtis pâissent bein paisibl'yes par les côtis; i' bêent auve les anges ès côtis en louangeant l'saint êfant.

Lé ciel est sablionné d'êtailes; tout y'est êcliaithi par l's êtailes. Y'en a tchi siêthent eune belle êtaile pouor v'nîn au saint êfant.

Ch'est un long but à Béthléhém; faîthons not' c'mîn à Béthléhém; j'îthons bétôt à Béthléhém; au bèr du saint êfant.

Air: Cantique 114, Recueil de Cantiques Méthodiste, 1889



Ayiz eune jougiyeuse et bouonne Fête dé Noué

Ayiz eune jouaiyeuse et bouonne Fête dé Noué; rêjouiss'-ous tréjous; d'chu moment toutes nos gênes s'sont bein liain dé nous.

Ayiz eune jouaiyeuse et bouonne Fête dé Noué; qu'la saîson r'sait dgaie; d'chu moment toutes nos gênes s'sont bein hortes la vaie.

Et nos r'v'chîn coumme au temps pâssé, janmais lâssés d'êt' ensembl'ye, coumme les anmîns bein près d'nos tchoeurs et bein heutheurs lus rassembl'yent.

Châque année j'nos rassembliéthons tréjous, s'lon lé d'si dé Dgieu. M'ttez eune êtaile sus l'arb' coumme ou lit ès cieux, et ayiz eune bein jouaiyeuse Fête dé Noué achteu.

À haut à marchi

j'sommes à haut à marchi à lôvier souos la leune tchi lit et j'sommes à voler par d'ssus la tèrre endormie

j'y sis bein cramponné à cachi dans chu bliu mînniet j'ai dêmuchi lé s'gret d'voler acanté té

j'pâssons des pays des vaîthinnés à rêvachi des dous et des montangnes, des bouaîs'sies et côtis

atout d's ièrs êcalés d'un embron trans'mé un châtchun craithait qu'il est à rêver

j'sommes à haut à dgêper à nagi dans chu ciel bein g'lé et j'sommes à fliotter par d'ssus des monts couèrts dé né

pis ava, voltilyant à flieur d'ochéan j'rêvilyons un piêssant paîsson êbaîllant

j'sommes à haut à marchi à valser l'travèrs d'eune niêtchie et là-bas l'monde rêjouis veulent bein nos atchilyi

Un Lô-lô d'Noué

Néthe coumme la Bibl'ye et bâsse est la nièrcheu; sans brit sont les cieux; ès clios, ès bouais, les bêtes sont paisibl'yes; "Tais'-ous," dit l'vent du Vouêt. Couoche-té don et dors, moussetchet couoche-té en paix, moussetchet: chutte matinnée à l'assinne dé Noué, tu t'rêvil'las au d'si du tchoeu.

Tchi pouôrre rouoyaume tch'est l'humbl'ye siez-sé dé man p'tchiot tréjous rouai! Et en haûtant, lé rêve tchi m'enfaûtôme lé couronn'na d'dgiamant. Couoche-té don et dors, moussetchet couoche-té en paix, moussetchet: chutte matinnée à l'assinne dé Noué, tu t'rêvil'las au d'si du tchoeu.

Chutte matinnée à l'assinne dé Noué, tu t'rêvil'las au d'si du tchoeu. Chutte matinnée à l'assinne dé Noué, tu t'rêvil'las au d'si du tchoeu.

Lé Cantique du Pommyi

Dans l'gardîn y'a un pommyi; dé tchi j'tchilyons les frits. Mathie nos donnit un fis; san nom est Jésû Chri.

Dans l'gardîn y'a un pommyi; san frit est dans l'preinseu. Mathie nos donnit un fis; tch'est not' chièr p'tit Saûveux.

Dans l'gardîn y'a un pommyi; bév'tonnons un lèrmîn. Mathie nos donnit un fis; tchi touônnit l'ieau en vîn.

Dans l'gardîn y'a un pommyi; lé mar est êglianmi. Mathie nos donnit un fis; et pouor nous i' sangnit.

Dans l'gardîn y'a un pommyi; san cidre a du pitchet. Mathie nos donnit un fis; pouor qu'san sang fûsse vèrsé. Dans l'gardîn y'a un pommyi; lé pus bé d'touos les bouais. Mathie nos donnit un fis; qu'nou cliouit à la crouaix.

Dans l'gardîn y'a un pommyi; san frit est bouôn et bé. Mathie nos donnit un fis; tchi des morts fut souôl'vé.

Dans l'gardîn y'a un pommyi; dé tchi l'doux cidre nou bait. Mathie nos donnit un fis; tch'est not' Seigneu et Rouai.

Dans l'gardîn y'a un pommyi; à Noué ses branques sont nues. Mathie nos donnit un fis; tchi fait flieuthi l'salut.

Dans l'gardîn y'a un pommyi; vèrsons-lî eune vèrrée. Mathie nos donnit un fis; j'vos souhaitons un Bouan Noué.

Air: Cantique 99, Recueil de Cantiques Méthodiste, 1889



Les ouaîsieaux dans lé gardîn

Les ouaîsieaux dans lé gardîn tuitent la nouvelle ès bouais et la tuit'tie dé l'ouaîth'lîn nos rempliétha dé jouaie: la rouoge-gorge et lé bliûtîn auve toutes les vouaix des bouais Chantons pouor louangi Jésû; dansons car il est né; mangeons en as-tu en veurs-tu, car ch'est la bouonne fête dé Noué.

Les pliantes l'avant ès maîsons sont flieuthies en mèrvelle; j'y viyons hortes lus saîson les roses et g'zettes si belles. Mais tch'est qu'en s'sait la raîson? La naîssance d'eune mèrvelle! Chantons pouor louangi Jésû; dansons car il est né; mangeons en as-tu en veurs-tu, car ch'est la bouonne fête dé Noué.

Né v'là ès clios, les brébis bêent jouaiyeusement en tchoeu. Les troupieaux sont bein rêjouis d'ouï pâler d'un Saûveux, et saûticotent ès côtis auve un cantique au tchoeu. Chantons pouor louangi Jésû; dansons car il est né; mangeons en as-tu en veurs-tu, car ch'est la bouonne fête dé Noué. Et par les banques et fossés, les moûques à myi bourdonnent, par un bieau solé d'Hivé tchi lit et caûffe et donne dé s'n or à la jouéyauté. Et l's anges ès cieux bourdonnent. Chantons pouor louangi Jésû; dansons car il est né; mangeons en as-tu en veurs-tu, car ch'est la bouonne fête dé Noué.

L'année est au pilôsi; lé monde est sens d'ssus d'ssous; la vie a 'té toute changie pouor ieux et vous et nous: j'éthons l'salut et la vie, même sans richesses ni sou. Chantons pouor louangi Jésû; dansons car il est né; mangeons en as-tu en veurs-tu, car ch'est la bouonne fête dé Noué.

Air: Cantique 129, Recueil de Cantiques Méthodiste, 1889



J'y chantons not' hodgîngnole

J'y chantons not' hodgîngnole not' hodgîngnole, not' Noué; j'y couothons par les chénoles dé La Rocque à Grosnez!

Jouaie et amour à té et étout à ta santé! Qu'Dgieu té bénisse et t'env'yie eune bein bouonne année et qu'Dgieu t'env'yie eune bein bouonne année.

Not' dgichon est faichonné en bouon bouais d'la bouaîs'sie. Prans du cidre épis vèrse-y d'ta miyeu bathilyie!

Jouaie et amour à té et étout à ta santé! Qu'Dgieu té bénisse et t'env'yie eune bein bouonne année et qu'Dgieu t'env'yie eune bein bouonne année.

Jé n'sommes pon des tchaîmands à tcheûter par les c'mîns, mais j'sommes dé tes connaîssants, les mousses à tes vaîthîns!

Jouaie et amour à té et étout à ta santé! Qu'Dgieu té bénisse et t'env'yie eune bein bouonne année et qu'Dgieu t'env'yie eune bein bouonne année.

Apporte-nous un mio d'podîn épis d'la gâche sus l'ais, d'la pitchette et tchiques pénîns; j't'èrmèrcions bein des fais!

Jouaie et amour à té et étout à ta santé! Qu'Dgieu té bénisse et t'env'yie eune bein bouonne année et qu'Dgieu t'env'yie eune bein bouonne année.

Bouanne Fête dé Noué!

Bouanne Fête dé Noué! Châque chandelle êcliaithe siez châtchun san tchoeu. Viyiz la veue, l'êtînchelle et lé feu! Tout r'lit atout l'amour dé Dgieu; tout chante acanté les anges ès cieux: Bouanne Fête dé Noué! Bouanne Fête dé Noué!

À Béthléhem, y'a un p'tit êfant à dormi dans l'tro; y'a des gardeurs dé brébis dans les clios. Viyiz les présents d's avisés! Tout est changi d'pis qu'chu p'tchiot fut né à Béthléhem, à Béthléhem.

Dors, p'tit êfant!
Bèrchi dans l'êtabl'ye acanté les bêtes,
qu'i' n'y'ait pon d'brit pouor té badrer la tête.
Taîs'-ous! Qu'i' n'y'ait d'aut' dé hèrtchîn.
Séyiz trantchil'yes siez l'dormeux divîn!
Dors, p'tit êfant! Dors, p'tit êfant!

Air: Cantique 146, Recueil de Cantiques Méthodiste, 1889

À la Sainte Lucie

Aniet, la Sainte Lucie, séthée au tchoeu d'l'Hivé; lé monde, tchi 'tait à l'ombre, vait cliai à ces sé. *Êtailes à nos prêchi, couronne à pétilyi pouor nos êmèrvilyi à la Sainte Lucie.*

Épis la bouonne nouvelle lit atout san blianc feu; toute carre enfaûtomée - clièrgie par sa lueu. Étailes à nos prêchi, couronne à pétilyi pouor nos êmèrvilyi à la Sainte Lucie.

La niet est horte achteu, né v'chîn la sinne dé jeu; chu monde es'sa netti, tout fliambant fîn neu. Étailes à nos prêchi, couronne à pétilyi pouor nos êmèrvilyi à la Sainte Lucie.

Donne-mé man Noué aniet

Noué! Noué! Man Noué, man Noué! Man Noué, s'i' vos pliaît! Man Noué! Donne un morcé d'gâche sus l'but dé l'ais!

Noué! Noué! Man Noué! Donne-mé man Noué aniet: eune modgie dé chaûdé et eune gâche fouôrrée.

Noué! Noué! Man Noué, man Noué! Man Noué, s'i' vos pliaît! Man Noué! Donne un morcé d'gâche sus l'but dé l'ais!

Noué! Noué! Man Noué! Donne-mé man Noué aniet: un gobîn dé pâté et eune bouonne vèrrée.

Noué! Noué! Man Noué, man Noué! Man Noué, s'i' vos pliaît! Man Noué! Donne un morcé d'gâche sus l'but dé l'ais!

Noué! Noué! Man Noué! Donne-mé man Noué aniet: eune paithe dé Chaûmonté, eune pomme dé Choutchet.

Tch'est qui s'est pâssé à ces sé?

Tch'est qui s'est pâssé à ces sé? À Béthléhem, ville dé Judée? Tch'est qui s'est pâssé à ces sé? Pouortchi chu camas, chu tinné? Tch'est qui s'est pâssé à ces sé?

Un fis nos a 'té né aniet, tch'est v'nu à seule fin d'nos saûver. Paix sus la tèrre étout ès cieux! Glouaithe au Bouôn Dgieu ès pus hauts lieux! Un fis nos a 'té né aniet!

Où'est qu'i' sont les gardeurs d'brébis? Et l'troupé à banon ès clios? Où'est qu'i' sont les gardeurs d'brébis? Ont-i' trouvé lé p'tchiot dans l'tro? Où'est qu'i' sont les gardeurs d'brébis?

Un fis nos a 'té né aniet, tch'est v'nu à seule fîn d'nos saûver. Paix sus la tèrre étout ès cieux! Glouaithe au Bouôn Dgieu ès pus hauts lieux! Un fis nos a 'té né aniet!


Iou qu'i' vont ches hoummes avisés? Pouortchi qu'i' siêthent l'êtaile tchi lit? Iou qu'i' vont ches hoummes avisés? Ont-i' des présents à bailli? Iou qu'i' vont ches hoummes avisés?

Un fis nos a 'té né aniet, tch'est v'nu à seule fin d'nos saûver. Paix sus la tèrre étout ès cieux! Glouaithe au Bouôn Dgieu ès pus hauts lieux! Un fis nos a 'té né aniet! Pouortchi qu'Hérode est si mârri? Chu rouai est-i' quâsiment fo? Pouortchi qu'Hérode est si mârri? Est-i' pouor machacrer les p'tchiots? Pouortchi qu'Hérode est si mârri?

Un fis nos a 'té né aniet, tch'est v'nu à seule fin d'nos saûver. Paix sus la tèrre étout ès cieux! Glouaithe au Bouôn Dgieu ès pus hauts lieux! Un fis nos a 'té né aniet!

Av'-ous ouï les anges à chanter? J'éthons-t-i' ichîn bas d'la paix? Av'-ous ouï les anges à chanter? Chant'-ous auve ieux lus chant dé jouaie? Av'-ous ouï les anges à chanter?

Un fis nos a 'té né aniet, tch'est v'nu à seule fin d'nos saûver. Paix sus la tèrre étout ès cieux! Glouaithe au Bouôn Dgieu ès pus hauts lieux! Un fis nos a 'té né aniet!



Béthléhem

À Béthléhem, ville dé Judée, il est dit dans la Bibl'ye qué Jésû Chri lé fis dé Dgieu fut né lé Jour dé Noué.

Écoutez don les anges tchi chantent, êcoutez à lus m'sage: i' dithent qu'aniet l'fis dé Mathie s'sa né à Béthléhem.

Joseph, Mathie, et la p'tite âne, traichîdrent éyou s'couochi. Dans l'êtabl'ye i' trouvîdrent eune tâne pouor Jésû dans l'râclyi.

Écoutez don les anges tchi chantent, écoutez à lus m'sage: i' dithent qu'aniet l'fis dé Mathie s'sa né à Béthléhem.

Les bèrgers, dans les clios couochis, vîdrent l'étaile si brillante et ouîdrent lé chant tchi v'nait du ciel lus dithe les bouonnes nouvelles. Écoutez don les anges tchi chantent, écoutez à lus m'sage: i' dithent qu'aniet l'fis dé Mathie s'sa né à Béthléhem.

Les trais sages hoummes et les bèrgers s'en fûdrent à Béthléhem, et dans l'êtabl'ye sus l'fain couochi lé p'tit Jésû dormait.

Écoutez don les anges tchi chantent, écoutez à lus m'sage: i' dithent qu'aniet l'fis dé Mathie s'sa né à Béthléhem.

Sonnez les clioches, chantez en glouaithe: not' nouvieau rouai est né, et l'houmme vivtha êtèrnellement à cause du Jour dé Noué.

Écoutez don les anges tchi chantent, êcoutez à lus m'sage: i' dithent qu'aniet l'fis dé Mathie s'sa né à Béthléhem.

Air: Cantique 172, Recueil de Cantiques Méthodiste, 1889



En Galilée i' nos est dit

En Galilée i' nos est dit, Garçons et fil'yes du p'tit village, Y'avait étout des p'tits êfants, P'tits, p'tits, touos p'tits, touos p'tits.

Et Jésû Chri d'meuthait tout près, Garçons et fil'yes du p'tit village, Près d'lus d'meuthe et méthe chiéthie, P'tits, p'tits, touos p'tits, touos p'tits.

Lus méthes chiéthies, ou pouvez craithe! Garçons et fil'yes du p'tit village, Voulaient tant qu'i' bénîsse les p'tits, P'tits, p'tits, touos p'tits, touos p'tits.

Mais les discipl'yes né voulaient pon, Garçons et fil'yes du p'tit village, qu'les êfants vînssent à Jésû Chri, P'tits, p'tits, touos p'tits, touos p'tits.

Mais Jésû dit: Laîssiz-les v'nîn, Garçons et fil'yes du p'tit village, Et les méthes étaient toutes ravies! P'tits, p'tits, touos p'tits, touos p'tits.

Faut qui sait seu partoute la tèrre, Garçons et fil'yes du p'tit village, Christ les bénit même dans ses bras, P'tits, p'tits, touos p'tits, touos p'tits.



Trais rouais d'l'Êst, hoummes avisés

Trais rouais d'l'Êst, hoummes avisés auve des presents, v'nez donner vos louanges au p'tit Christ tch'est né: *Cum Virgine Maria*.

L'or, ch'est un présent rouoya; L'enchens, pouor san rectorat; La myrrhe, ch'est s'n onguent finna: *Cum Virgine Maria*.

N'y'a pon d'fîn à san pouver; i' règne sus tout tch'a 'té grée; tout s'pâsse s'lon san bouôn vouler: *Cum Virgine Maria*.

À li sait toute louange, toute glouaithe, toute honneu et toute victouaithe; jé n'pouôrrons janmais nos taithe: *Cum Virgine Maria*.

les anges en tchoeu prannent lé vo; i' chantent d'ite coumme d'ito pouor chu mousse bèrchi dans l'tro: *Cum Virgine Maria*.

Chantons touos à l'Iun en Trais en tchoeu nos cantiques dé jouaie pouor l'béni à haûteu d'vouaix: Cum Virgine Maria.

Craûle douochement, bèr

Craûle douochement, bèr: lé saint p'tchiot s'est accliâssé. Craûle douochement, bèr: i' sauv'tha touos l's avièrs. Craûle douochement, bèr: au son des cantiques dé Noué, les bouais lus vèrquent ès côtis à ces sé.

Vente douochement, vent: un mithacl'ye est à s'pâsser. Vente douochement, vent: qu'i' sait au lis, ch't êfant. Vente douochement, vent: qu'la bouonne nouvelle sait soûffliée qu'les brébis bêent ès côtis à ces sé.

Caûffe douochement, feu:
lé p'tit êfant est lâssé.
Caûffe douochement, feu:
acanté l'âne et l'boeu.
Caûffe douochement, feu:
coumme tes fliambes êcliaithent la niet,
les êtailes lithent ès côtis à ces sé.

Tchai douochement, né: les bonds d'né y sont tâssés. Tchai douochement, né: né v'chîn l's hoummes avisés. Tchai douochement, né: un tas d'présents sont donnés au mousse tch'a 'té né pouor nous à ces sé.

Chante douochement, tchoeu:
né rêvilyiz pon l'avé.
Chante douochement, tchoeu:
étout ès pus hauts lieux.
Chante douochement, tchoeu:
"Paix sus la tèrre" sait chantée
par lé tchoeu d'anges ès côtis à ces sé.

Air: Cantique 185, Recueil de Cantiques Méthodiste, 1889



Qu'i' tchaie d'la né, tchaie d'la né, tchaie d'la né

Oh par les c'mîns i' fait eune fraid d'tchian, mais j'avons un bouôn feu caûffant, et d'pis qu'j'y sommes embottés, qu'i' tchaie d'la né, tchaie d'la né!

N'y'a autchun sîngne dé clièrgeon, mais j'ai du mangi et d'la bouaisson. Les veues ont 'té dêtouônnées, qu'i' tchaie d'la né, tchaie d'la né!

Quand j'dithons à la fîn bouonne niet, jé s'sai sus l'pavé ou autant vaut! Mais s'tu veurs vraînment m'cadlinner, en rallant siez mé j'éthai caud.

Lé feu est douochement à s'baîssi, j'sommes, ma douoche, à nos embraichi, et s'tu t'en vas tréjous m'aimer qu'i' tchaie d'la né, tchaie d'la né!

Les clioches dé Noué

Les clioches à ces sé lus en vont sonner auve lé boeu bueûler et l'âne braithe qué d'pus bé: Un p'tchiot a 'té né et dans l'tro êtrav'lé.
Ouïyiz les clioches dé Noué à sonner à ces sé!

Les clioches à ces sé lus en vont sonner.
Des anges d'valent des cieux pouor louangi lé Bouôn Dgieu, et en tchoeu chanter par lé ciel êtailé.
Ouïyiz les clioches dé Noué à sonner à ces sé!

Les clioches à ces sé lus en vont sonner.
Des gardeurs d'brébis gabathent des fraids côtis auve un p'tit angné, un p'tit angné tchi bée.
Ouïyiz les clioches dé Noué à sonner à ces sé!

Les clioches à ces sé lus en vont sonner.
Des hommes avisés ont dé tchi à donner - des bein riches présents: la myrrhe, l'or et l'enchens.
Ouïyiz les clioches dé Noué à sonner à ces sé!

Les clioches à ces sé lus en vont sonner.
Rêjouiss'-ous tous don!
Et auve du rêvillon atchilyiz l'avé tch'est v'nu pouor nos saûver!
Ouïyiz les clioches dé Noué à sonner à ces sé!

Air: Cantique 29, Recueil de Cantiques Méthodiste, 1889



Mé, j'voudrais vaie un bieau blianc Noué

Mé, j'voudrais vaie un bieau blianc Noué coumme les cheins à tchi qu'j'ai rêvé auve des bouais aube-gélés et des mousses au dget pouor ouï des clioches dans la né.

Mé, j'voudrais vaie un bieau blianc Noué coumme sus les cartes dé Noué qu'j'êcris. Qu'tes jours saient tréjous êcliaithis et qué siez té châque Noué sait blianchi.

Lé Cantique du Tchoeuryi

Maît' Joseph 'tait un bouôn vyi, un vyi bouon à mathier, quand i' s'mathyit à Mathie du pays d'Galilée.

Joseph et Mathie pâssaient par un gardîn à frit dé tchi les tchoeurièrs portaient des tchoeurs comme eune sangnie.

Mathie en eut un affit et dit bein tchoeuthûment: "Tchil'ye-mé un tchoeur, chièr Joseph, pouor mé et mén êfant."

Là-d'ssus Joseph vînt mârri, et dit dans un grand d'so: "Qué ch'tî-chîn louoche lé tchoeuryi tch'a 'té l'péthe à tan p'tchiot!"

Épis l'êfant s'êcatchit dans la bielle à sa méthe: "Baîsse tes branques, arb', pouor Mathie; Joseph n'en étha dgéthe."

Lé pus haut tchoeuryi s'baîssit; Mathie tchilyit des tchoeurs, des tchoeurs rouoges comme eune sangnie d'un corps morté tchi meurt.

Mange tes rouoges tchoeurs, don, Mathie. Joseph, né fai pon d'teurs: l'êfant tchi c'mande un tchoeuryi, quémand'da touos nos tchoeurs.

Lé Cantique dé la Sèrvelle dé Noué

Né v'chîn les fêtes tchi r'veinnent; lé Saint P'tchiot r'est ichîn. Cârr'-ous d'pits et d'fontaines dé tchi l'ieau touônnent en vîn. Ch'est la niet quand tout s'sa changi: lé Salut veindra auve lé Fis.

Les clioches dé Noué clyîncâlent: ch'est l'apprèche dé mînniet. V'là les vaques dans lus stâles à g'nouors pouor l'adouother. Ch'est la niet quand tout s'sa changi: lé Salut veindra auve lé Fis.

Pliaichiz du housse à haut; ch'est d'pather not' siez-nous pouor pliaithe ès p'tits faîtchieaux et à tout l'monde étout. Ch'est la niet quand tout s'sa changi: lé Salut veindra auve lé Fis.

Dansons lé tou dé l'arb' dé Noué

Dansons lé tou dé l'arb' dé Noué et j'éthons eune bouonne séthée. Viy'-ous où'est qu'lé dgi est croch'té; châque coupl'ye est pouor s'y'arrêter.

Dansons lé tou dé l'arb' dé Noué; l'esprit d'Noué est mangnifique. Pus tard jé mang'geons du pâté épis chant'tons des cantiques.

Ous éthez un sentiment bein jouaiyeux en ouïyant d'la chant'tie en excitâtion: "Prans du housse pouor décorâtion"

Dansons lé tou dé l'arb' dé Noué; qué tout l'monde lèvent lé dgéthet. Lé monde lus rêjouissent à danser dèrché comme au temps pâssé.

Jésû veint au haut dg'ieau

Havo! J'îthons à la pêque, j'nos saûssons dans l'salut; si chutte nouvelle nos chaûmêque, i' nos r'pêqu'tha, Jésû. Nos péchés s'sont lavés hors en mé, comme sus la tèrre, par cause dé chu p'tchiot tchi dort, à Béthléhem dans l'bèr.

Des brébis blianches comme du r'sîn, et d's anges habilyis d'glouaithe, la véthité en vrégîn racontent chu saint mystéthe: qu'eune mathée d'grâce a monté, qu'lé bonheu bat san pliein, les louêmes sont à raconter qué l'haut dg'ieau d'jouaie nos veint.

L'êtaile s'y rade en lithant; la jouaie nos veint au fliot et n'y'étha pon d'èrtithant du salut v'nu dans l'tro. Eune mathée d'ches bouonnes nouvelles chantées par l's anges à haut, ès clios, ès montangnes, ès mielles: Jésû veint au haut dg'ieau.

Air: Cantique 94, Recueil de Cantiques Méthodiste, 1889



V'là qu'ou r'quémenche, la saîson dé nos rêjoui

V'là qu'ou r'quémenche, la saîson dé nos rêjoui: ch'est la Fête dé Noué! Et bétôt j'r'îthons boutitchi dans les boutiques bein êcliaithies, auve des chucrîns et jouettes à acater.

V'là qu'ou r'quémenche, la saîson dé nos rêjoui: Lé housse r'est pendu. Mais la pus belle couronne qu'i' y'ait s'sa la couronne qué nou vait siez sé sus sén us.

Des p'tites gâches à chucre et des ourses en pliuque pouor faithe pliaîsi ès p'tchiots et avièrs; des boutelles dé porto et un tas d'tchi acouo pouor l'bouon amendement des vielles et vièrs; et M'mèe et P'pèe souhait'taient l'èrtou ès cliâsses des êcolièrs.

V'là qu'ou r'quémenche, la saîson dé nos rêjoui: ch'est la Fête dé Noué! Y'a un arb' dans lé Vièr Marchi, et les veues ont 'té haûlîndgies, et ch'est d'espéther ofûche eune achie d'né.

V'là qu'ou r'quémenche, la saîson dé nos rêjoui: ch'est la Fête dé Noué! Les clioches sonnent et i' s'adonne qué l'cantique qué nou chantonne sonne tréjous siez sé.

V'là qu'ou r'quémenche, la saîson dé nos rêjoui: lé housse r'est pendu. Mais la pus belle couronne qu'i' y'ait s'sa la couronne qué nou vait siez sé sus sén us. Bein, Noué est r'vénu!

Lé Cantique dé Coventré

Lô-lô, lô-lô, dors ilo pétit p'tchiot Lô-lô, lô-lô, lô-lô Lô-lô, man p'tit p'tchiot Lô-lô, lô-lô, lô-lô

Mes soeurs, comme tchi bein l'protégi achteu contré tout dro? Qu'chu pouôrre êfant ouaie bein not' chant: Lô-lô, lô-lô, lô-lô

Hérode lé rouai sans drouait ni paix a c'mandé à ces sé à ses soudards dé faithe lus part: touos les p'tchiots machacrer

J'ai-t-i' pitchi pouor té, man p'tit, et j'en plieuth'thai acouo! J'né t'lâqu'thai pon sans chutte chanson: Lô-lô, lô-lô, lô-lô

Lô-lô, lô-lô, dors ilo pétit p'tchiot Lô-lô, lô-lô, lô-lô Lô-lô, man p'tit p'tchiot Lô-lô, lô-lô, lô-lô

J'voudrais qu'ché sait châque jour lé jour dé Noué

Oh, quand l'bouanhomme apporte la né ofûche il aim'thait bein saver qu'sus des faches il a mîns un bein grand souôri Si tu t'couoche dédans tan liet èrcaûffe-té souos tan blianket laîsse l'us dêbarré tu sai qu'lé bouan Papa Noué est d'appréchi

Bein j'voudrais qu'ché sait châque jour lé jour dé Noué quand les mousses chant'taient et les sonneurs es'saient à jouer Oh j'voudrais qu'ché sait châque jour lé jour dé Noué Sonnez les clioches pouor l'matîn d'Noué

Quand j'sommes dans l'par à patîns si eune néthe fraid est pouor v'nîn pis tes joues en rose m'êcliaith'thont lé bieau c'mîn et achteu y'a des candelles dans ma barbe, ch'est qu'i' la gèlent Couochons-nous l'avant au feu qu'les rêves les fondent dévant l'matîn

Bein j'voudrais qu'ché sait châque jour lé jour dé Noué quand les mousses chant'taient et les sonneurs es'saient à jouer Oh j'voudrais qu'ché sait châque jour lé jour dé Noué Sonnez les clioches pouor l'matîn d'Noué

Oh, quand l'bouanhomme apporte la né ofûche il aim'thait bein saver qu'sus des faches il a mîns un bein grand souôri Si Jean Noué cache san traîné l'travèrs du ciel êtailé j'êcriv'thai man nom dans la né sus l'lief pouor qu'i' vielle rester

Bein j'voudrais qu'ché sait châque jour lé jour dé Noué quand les mousses chant'taient et les sonneurs es'saient à jouer Oh j'voudrais qu'ché sait châque jour lé jour dé Noué Sonnez les clioches pouor l'matîn d'Noué

Y'a du bouon, mousses, allez

Bein j'voudrais qu'ché sait châque jour lé jour dé Noué quand les mousses chant'taient et les sonneurs es'saient à jouer Oh j'voudrais qu'ché sait châque jour lé jour dé Noué Sonnez les clioches pouor l'matîn d'Noué

Chârez auve tous vot' amour ches Noué

quand l'bouanhomme apporte la né quand l'bouanhomme apporte la né quand l'bouanhomme apporte la né...

La Chanson d'Noué (Y'a des mârrons à rôti sus l'feu)

Y'a des mârrons à rôti sus l'feu l'ouaîsé à rouoge bé est d'houors y'a des cantiques chantés par un tchoeu et l'monde sont abriés d'amors

Tout l'monde sait qu'un picot et du dgi font la saîson jouaiyeuse et cliaithe et ches p'tchiots tch'ont l's ièrs bein rêvilyis à ces sé n's'endormithont dgéthe

I' savent qu'i' veindra, Papa Noué il a chèrgi un tas d'jouettes sus san traîné et châque pétchiot s'en va rester au dget pouor vaie si les chèrs pouor lé vrai peuvent voler

Don j'vos propose chu sîmpl'ye pétit souhait ès mousses, ès vièrs et à tous Ouaithe qu'nou l'ait dit partout l'monde bein des fais un raide Bouan Noué à vous

Don j'vos propose chu sîmpl'ye pétit souhait ès mousses, ès vièrs et à tous Ouaithe qu'nou l'ait dit partout l'monde bein des fais un raide Bouan Noué un raide Bouan Noué un raide Bouan Noué à vous

Lé Cantique du Vièr Noué

Aniet ch'èrest lé six d'Janvyi: un Bouan Vièr Noué! J'avons bu et j'avons mangi: tchi Bouan Vièr Noué! Dansons et faîthons rêvillon, l'Hivé n'duthe pon trop long. L'année tchi c'menche s'sa remplyie d'ji: un Bouan Vièr Noué!

Aniet ch'est Noué au mais d'Janvyi: chu Bouan Vièr Noué!
Not chaûdé est bein êpici au Bouan Vièr Noué!
La saîson d'Noué veindra à fîn, doux comme du chucre scandîn.
J'éthons d'la gâche et acouo d'tchi: un Bouan Vièr Noué!

L'vez vos vèrres à Noué en Janvyi: au Bouan Vièr Noué! À la santé d'la compangnie: un Bouan Vièr Noué! Dé tchi bein fait est fait deux fais; et j'èrfêtons chu mais. Au Nouvel An, not' Noué est vyi: un Bouan Vièr Noué!

Air: Cantique 186, Recueil de Cantiques Méthodiste, 1889



Sav'-ous comme tchi craît' des arb's dé Noué?

Sav'-ous comme tchi craît' des arb's dé Noué? Auve du solé. L'solé n'peut pon les craît' à san gré. I' faut d's achies. L's achies n'peuvent pon craît' ches'-là. Et né v'chîn pourtchi: En Hivé la plyie gèl'la et l's arb's vont mouothi.

Sav'-ous comme tchi craît' des arb's dé Noué? I' faut l'solé et d's achies, d's anmîns, d'la bouônté, et pus qu'chenna, faut d'l'amour.

Sav'-ous comme tchi qu'i' veint, Papa Noué: Auve des brîns d'né. Les brîns d'né n'peuvent dgéthe lé faithe voler: i' faut des chèrs. Les chèrs veulent bein y'êprouver, sans pouver d'couôteunme. I' daivent voler eune bordée, et i' n'ont pon d'plieunmes.

Sav'-ous comme tchi qu'i' veint, Papa Noué? I' faut d'la né et des chèrs, l'solé et d's achies, d's anmîns, d'la bouônté, et pus qu'chenna, faut d'l'amour.

Sav'-ous comme tchi graie des cartes dé Noué? Auve des portraits. Des portraits n'peuvent pon l's ag'ver, j'ai r'gret; I' faut des souhaits. Des souhaits dithent chein tch'est dans l'tchoeu, êcrit dans des mots, Mais pouor rêjoui l'èrchéveux, il en faut acouo.

Sav'-ous comme tchi graie des cartes dé Noué? Faut des portraits et des souhaits, d'la né et des chèrs, l'solé et d's achies, d's anmîns, d'la bouônté, et pus qu'chenna, faut d'l'amour.

Driving home for Christmas

Jé m'rad'dai siez mé ches Noué
J'veurs èrvaie ches faches d'anmîns
Jé m'rad'dai siez mé ches Noué, véthe
bein, j'en trouv'thai l'miyeu c'mîn
J'ai 'té à banon
mais j'y'arriv'thai
auve chutte chanson
pouor rêjoui l'tchoeu tout comme
Jé m'rad'dai siez mé,
j'cach'chai siez mé ches Noué
v'là tchi m'prend du temps mais j'arriv'thai

J'èrvail'lai siez mé ches Noué J'èrvèrrai mes chièrs et chiéthes J'èrvail'lai siez mé ches Noué, véthe j'pâss'sai La Corbiéthe et j'té chant'tai par sus les louêmes chutte chanson d'jouaie pouor té rêjoui d'même J'èrvail'lai siez mé, Jé m'rad'dai siez mé ches Noué

J'r'îthai siez mé ches Noué acanté mille mémouaithes j'èrgarde lé viageux au ras d'mé un compangnon man compangnon J'èrvol'lai siez mé ches Noué tout lé travèrs d's êtailes
J'èrvol'lai siez mé ches Noué, véthe en r'dévalant du ciel et j'té chant'tai du haut en bas chutte chanson d'jouaie tchi t'rêjouitha
J'èrvol'lai siez mé,
Jé m'rad'dai siez mé ches Noué

Jé m'rad'dai siez mé ches Noué acanté mille mémouaithes j'èrgarde lé viageux au ras d'mé un compangnon man compangnon,

siez nous ches Noué siez nous ches Noué

Lé Cantique des Brandons

Brandons, brandons, auve nos brandons couothons vaie lé p'tchiot dans l'tro. Christ est né, et j'l'adouoth'thons. Couothons lî chanter lô-lô.

Ah, lô-lô, lô-lô, chièr pétit. Ah, lô-lô, lô-lô, man p'tchiot. Dors en paix où'est qu'châque brandon lit quandi qu'jé t'chantons lô-lô.

Chantons, m's anmîns, séyons rêjouis: jouaie et leunmiéthe tréjous. Nos brandons sont à êcliaithi l'êfant tch'a 'té né pouor nous.

Lé Cantique des Annimaux

Dans l'êtabl'ye, l'âne et l'boeu braient lus cantique dé jouaie. Lé v'là lé p'tchiot achteu; les annimaux lé vaient.

Lé j'va hale lé hèrnais à fain pour faithe san liet pouor qu'il y dorme en paix siez l's annimaux à Noué.

L'angné et la brébis vil'yent sus chu saint êfant. Lus bêlement va l'bèrchi si douochement, si douochement.

Ronne, colombe; tuite, marté! Racontez la mèrvelle! Lé cahouain dans la niet la crie jusqu'ès êtailes.

La bête à saie, ou honne dans l'êtabl'ye où'est qu'i' s'tâne. Ch'est l'salut qu'i' nos donne acanté l'boeu et l'âne.

Air: Cantique 67, Recueil de Cantiques Méthodiste, 1889



Îndex dé titres dans les langues originnales

Adeste fideles	6
All I want for Christmas is you	89
Angels from the realms of glory	21
As with gladness men of old	28
Away in a manger	84
Byla cesta, byla ušlapaná	118
Cherry tree carol	146
A Christmas Lullaby	125
The Christmas Song (Chestnuts roasting on an open fire)	154
Come thou fount of every blessing	104
O come, o come, Emmanuel	8
Coventry Carol	151
Deck the halls	27
Ding-dong merrily on high	35
Do you know how Christmas trees are grown?	156
Driving home for Christmas	157
Eastern Monarchs, Sages Three	139
The first Nowell	18
The Friendly Beasts	85
God rest you merry gentlemen	14
Hark the Herald Angels sing	68
Hajej, nynej / Rocking Carol	121
Have yourself a merry little Christmas	123
Here we come a wassailing	130
The Holly and the Ivy	12
I heard the bells on Christmas Day	75
I saw three ships	66
I wish it could be Christmas everyday	152
I'm dreaming of a white Christmas	145
In the bleak midwinter`	16
It came upon the midnight clear	30
It's beginning to look a lot like Christmas	150
Jesus Christ the Apple Tree	76
Jingle bells	34
Joy to the world	64
Let It Snow! Let It Snow! Let It Snow!	142
Little donkey	70

Little drummer boy	39
O little town of Bethlehem	42
The Lord at first did Adam make	80
Mary's Boy Child	50
Minuit, chrétiens	105
Noël Nouvelet	133
Nous voici dans la ville	94
Ny Drogh Vraane	92
Oikan ayns Bethlehem	96
Once in Royal David's city	32
Půjdem spolu do Betléma	114
Personent hodie	20
Rockin' around the Christmas tree	148
Rudolf the red-nosed reindeer	49
Santa Claus Is Comin' to Town	82
Santa Lucia	132
See amid the Winter's snow	97
Silver Bells	87
Slyšte, slyšte pastuškové	116
Stille Nacht / Silent Night	11
Sussex carol	33
O Tannenbaum / O Christmas Tree	17
Torches	159
The twelve days of Christmas	22
Walking in a Winter wonderland	65
Walking in the air	124
We three kings	52
We wish you a merry Christmas	10
When a child is born	113
While shepherds watched	26
Wonderful Christmastime	109
7ezulka	117

